

莲洋诗钞

吴雯

文硕阁

wenshuoge.com

目录

关于我们 3

提要 5

原序 6

卷一 9

卷二 26

卷三 36

卷四 59

卷五 72

卷六 75

卷七 78

卷八 92

卷九 98

卷十 100

附錄 106

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部七

莲洋诗钞 别集类六 【国朝】提要

【臣】等谨案莲洋诗钞十卷

国朝吴雯撰雯字天章本辽阳人顺治六年其父允升任蒲州学正卒于官雯兄弟孤弱不能归遂为蒲州人康熙己未荐举博学鸿词不中选其卒也刑部尚书王士禛为志其墓称初见其诗有泉绕汉祠外雪明秦树根浓云湿西岭春泥沾条桑至今尧峯上犹见尧时日诸句吟讽不絕于口所作居易錄中又亟称雯西城別墅諸篇趙執信怀旧詩序亦稱雯拙于時藝困蹶場屋中體貌麤丑衣冠垢敝或經歲不盥浴人咸笑之然詩才特超妙其詩一刻于吳中再刻于都下三刻于津門後士禛為刪定存千余首亦見墓志中因雯沒之後未及刊行故怀旧詩序曰蓮洋卒後阮翁為作墓志且刪定其集迄今將二十年未行于世意其時阮翁耄而多忘未几遂沒未及歸諸吳氏耶池北書庫散失殆盡蓮洋集從可知矣云云然其集實已歸吳氏乾隆辛未汾陽劉組曾裒其全稿刻之又以士禛所評者別刊一小冊并行越十三年甲申山東孫諤官蒲州府同知始從雯侄敦厚得士禛所定原本簡汰重刊詳載士禛之評並以劉本所遺者補刻於後復以所見墨迹補之其士禛所刪而劉本誤刻者咸為汰去凡得古詩二卷近體五卷補遺一卷詩遺一卷文一卷冠以墓志而附以同時唱和題咏之作即此本也雯天才雄駿其詩有其鄉人元好問之遺風惟熟于梵典好拉雜堆砌釋氏故實是其所短劉本所刻無所持擇頗傷冗濫此本沿新城之派又以神韻婉約為宗一切激昂沉着之作多見屏斥反以鄰于清弱亦不足盡其所长然終較劉本為簡潔故置彼錄此至其所載士禛評語繁碎特甚如題汪玉輪看劍圖詩下附記云原本評語奇作二字似阮亭先生筆迹胸有造化四字非阮亭先生筆迹刻本并作一处誤又如城曲眺望詩下附記云原本題下有墨筆評劉長卿之詩也不知何人評阮亭先生改作絕似劉長卿云云此亦何关宏旨而字句異同乃如是其珍重之今悉删除以廓清耳目焉乾隆四十四年四月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

原序

莲洋诗钞原序

河中为郡当两戒之首形胜冠寓中记称太华中条本为一山巨灵鼉屨掌华蹈襄开为二以通河流禹贡之壶口雷首龙门华陰正当其处古秦晋之交也中条之南有地曰永乐唐诗人玉溪生故居在焉水经云河水又东永乐涧水注之注谓渠猪之水即其地也经又云河水又东北玉涧水注之注谓水南出玉溪义山自号盖取诸此吴生家永乐读书奉母耕牧河山之阳家苦贫数数出游走燕赵齐鲁梁宋吴越之墟所至与其仁贤游处归而有诗数百篇古澹闲肆得古作者精意而自成一家之言灼然可传於後者也昔在丁戊间生来京师余挟其篋得蠹简数十番读而骇叹谓非流俗所应有以示刘吏部汪户部梁侍御三君方枋文章海内其骇叹复不减予今十余年矣比生再入京师则三君者皆解官归卧或十余年或七八年而吏部又前歿昔之与生游相知者独余在耳相与追道往事太息感慨至於泣下呜呼以生之才挟其文艺游於四方历十余年而所号为知己者无过予辈四三人不数年间皆散去或且化为异物久矣岂不重可感哉於是予召之饮酒既酣复挟其篋则其诗雷硠划豁又过於昔予读之河倾灯灺不知止惜乎三君子不在不获与之矜赏如曩时也会

天子下诏求博闻之士备

顾问著作於是谢比部方山以生名应

诏或以为生与司马子长生同里又同远游其才皆不世出盖河山之气融结於千岁之久宜其先後相望无愧色是固然矣然子长生逢武帝右文不免戮辱发愤述史记生遭遇休明以布衣之贱一日名達

黼展行且荷橐簪笔立第二螭坳之下曾何子长之足云又况义山白首幕府名不挂朝籍者哉渔洋山人王士禛序

吴徵君天章墓志铭

汉魏已来二千余年间以诗名其家者衆矣顾所号为仙才者惟曹子建李太白苏子瞻三人而已

本朝大一统閱六十载作者亦多矣余独以仙才许蒲坂吴君此余之私言也亦天下之公言也君且死语弟霞曰吾平生知己无逾渔洋先生吾即死遗诗勿遽出必待先生删定虽相望二千里而勿惮跋涉而往求焉且謁志墓之文吾无憾矣余居田里闻君之讣为哀挽以代楚些其末云已空文字障静阅庄严劫何事劳结集犹烦大迦叶未几而霞至将君遗命余诗若为之?然呜呼异哉岂余与君精神感通虽越在二千里不以幽明间有如此耶既次其诗遂为其铭君讳雯字天章其先辽阳人也父允升中顺治二年顺天乡试六年

授蒲州学正十二年

赐同进士出身明年卒後次年吏部按籍铨授知临颖县君幼孤母朱氏有节操抚君及弟霞等皆成立遂籍於蒲君姿秉殊絶嗜书如饮食又薄帖括以为不足为虽在诸生辄浏览羣籍自六经三史外先秦两汉下逮六朝唐宋元明四部之书无弗习也旁及释老内典秘笈皆鈎贯其旨趣含咀其英华而尤於五际六义有深嗜焉初侨居中条山南之永乐永乐唐县也李石兄弟三相皆居之诗人李商隐义山亦居之号玉溪生玉溪者永乐水名也君少而食贫无以为养数游京师谒父执友年二十余矣京师士大夫无知其诗者予一日过同年荣工部洞门见其诗云泉遶汉祠外雪明秦树根又云浓云湿西岭春泥沾条桑至今尧峰上犹见尧时日大异之曰此非今人之诗也吟讽不絶於口久之君再入京师一见谈艺辄夜分不休如释迦之有鷲子汾山之有寂子相说以解不待往复扣击君固以谓余一人知己如后山之於南丰也戊午己未间

天子诏徵博学宏词之儒备

顾问特举制科海内名士鳞集

阙下君在举中顾独耽寂守素不与他人走健仆囊巨轴宛顔低眉望门求知者竞驰逐胶牢澹泊门有雀罗余以是益重之临朐冯相国知君名以扇索其诗君大书二絶句答之其坦率如是卒以不遇亦不悔也君游燕赵齐鲁吴越秦楚足迹半天下而梁宋间诗尤工晚访旧天津复与余相见京师时康熙辛巳君年将六十倦游矣君好友天下士士之名雅者亦皆援君自重所至编紵赠答无虚日然君胸中泾渭不徇世俗毁誉凉燠以为亲疎故人亦乐就之所谓嵇叔夜土木形骸黄叔度汪汪如千顷陂者庶几似之平生好仙释有空诸所有仰青云睹白日之意情耽隐逸仆仆四方谋升斗以为甘旨之奉非其志也尝买圃郑谷之口有竹数百挺黄梅数十株橘三株中作草堂面雷首肘太华怡然自足将以终老而迄不得遂呜呼其可悲也君诗一刻於吴中再刻於都下三刻於津门今未刻尚千余篇余删之不少贷所存皆卓然可传盖痛君弥留不忘誨谕之意亦以报良友於地下云尔今

当宁右文士苟怀一艺朝蹶芒屨而夕登馆阁者何限君之

名固已闻於

朝矣而终不遇穷老以死是尤可悲也君娶祁氏有子二人江兰早卒崇厚州附学生亦前卒继娶聂氏孙一逢源尚幼君卒以康熙四十三年甲申五月二十七日得年六十有一以康熙四十五年九月十一日葬姚温阡君尝以诗赋应制科故称徵君铭曰

山河两戒皆首河中重华旧都扶輿所鍾昔在唐贤摩诘【王右丞祁人徙河中】允言【卢纶河中人】义山玉溪【李商隐怀州人居永乐】表圣王官【司空图虞乡人】有明名世首两襄毅【杨公博王公崇古】勲名烂然风骚未继岳岳吴生崛起布衣身处菰芦名动京

师声满天下尚谋升斗晚卜菟裘子真谷口惟君之诗疏越朱弦後有知者移情成连神之往来河声岳色【君得古铜印刻此四字】修竹梅花徵君攸宅

赐进士出身资政大夫原任

经筵讲官刑部尚书前都察院掌院事左都御史新城年家老友王士禎撰

卷一

钦定四库全书

莲洋诗钞卷一

蒲州吴雯撰

五古

行行重行行

离亭送君去三里闻马声五里马无迹十里云树平嗟彼云树繁不知人有情乾坤静如掌万里见君行

遥题王咸中石鵑山房

积水浮九州东南益荡涵人家半洲岛萝筱互蒙密具区我旧游石鵑君栖逸至今尧峰上犹上尧时日窗外一湖明阶前衆山出春风散岩花细雨溜厓蜜仙灵每来往真儒间俦匹表圣具生圻维摩得丈室泉声四回抱岭势百岑崿何日复赢粮为君访衡泌

岱路中作

入山不五里景色凄以繁泉绕汉祠外雪明秦树根狂飈晚藤落斜日溪禽喧悠悠游子心对之转忘言时序既以殊宁不感乡园马上重叹息带暝投孤村

偶然作八首【録四首】

世事日纷纭智者不能料所以古圣哲信心在吾道坚执无委蛇宝珠溷泥淖光辉究难掩终古具灵照风雷亦偶然天心发忠孝笃信德之基勿使前人笑

农夫何辛苦畊获霜露间蚕女守桑筐一裙常不完嗟我才知书坐食衣有绵天心岂见私遭逢或偶然苟不崇令德是谓蒙冥顽读史皆上口玩物丧本原组织月露辞及物输一钱何以报元化勉哉当体乾

卫足亦有葵芘根亦有葛苟能慎道义何至堕险恶人生日诡随趋避反成错君子信固然天命有余乐言行动天地拟议居其先因之成变化圣人皆勉然率意即为妄师心亦多偏良金须就冶质美形乃全江海苟无则终古悲狂澜布帛固有幅罟慾垂至言奇气尚收敛英雄归大贤

杂咏二首【録一首】

读书一万卷寸衷转茫昧将无昔人心翻在语言外闻见苦不多因贪反成害束书坐林间飒飒闻天籁

柬陈说岩先生

昨从太行来曾过先生舍高松垂女萝空山一系马京洛劳问讯陶陶乐情话身栖魏阙边心在白云下

寄巢薇先生

泰山何其高沧海何其深我翁具伟抱高据阆风岑鸣佩入天阍紫云荡衣襟宇宙感太和啾啾凤凰音苍生引领望薄海霏霖繁余瓠落久徒伤年髯侵冰霜历沍寒幸托乔木阴梧桐有繁枝竹实比兼金几时敦行苇兼聆卷阿吟

阳山

落日山风吹长松乱清影白云逗残雪忽见前峰暝野鸟下寒竹孤僧汲修绠聊欲遂幽寻理策渡西岭暮春雨中阮亭先生招同诸公集善果寺得曲字

古寺城西隅寺路直还曲幽人此来往渐与山僧熟煮茗石幢下石鼎轻烟覆一花余春荣衆阴长夏緑松深鹤唳静竹动鸟飞速人生一世间光景如转烛宇宙旷无垠何为自刺促胜侣欣招邀佳时值休沐名香风过院仙梵雨垂屋向晚孤霞明白云傍檐宿苍苍林月上世界明金粟归途重回首遥山寄遐瞩

题张杞园浮家泛宅图

海气何茫茫海风犹浩浩日上琅琊台孤霞在云表常慕羽人都沧波肆幽讨尘羈未得去屡负苍苍岛之子水仙侣浮家谢机巧载书满船头双鬟更娟好似恋鳊鱼肥繫?近芳草风檣白鹭过雨舵垂杨扫何不便飒然竟访成连道帆行鼃鼃上青俯齐鲁小世外见桃花千春不知老

集阮亭先生宅得秉字

冥冥花枝晚寥寥天宇静清言喜忘倦坐失春宵永风过堦草翻月动巢鹤醒兰烟方爇案麝火恰明鼎醉堕席上杯渴忆山中井京洛去复来岂曰违夙秉愿言晤亲串聊取畅孤迥劳劳慕石隐买田不盈顷空泛洞庭波积雨愁舴艋山鬼颇便娟女萝太幽冷人生分有定利钝敢强骋早闻椎与槌幽蓟别汝颖缘随双象马梦谢头纲饼物情苍狗态世事孤鸿影倘未早识

别无乃昧要领军青莲花岳岳插青冥吾将扫石坛坐卧南峰顶

黄湄先生游太华山遂得结屋地赋赠

车箱谷口云白照松间路谁能访叔卿岩窞一身度黄门具奇情振策御风步万仞入洪蒙理
胜境无怖壑转晦明错树老丹青误俯见苍苍原明河正东注骤雨忽翻瀑肘腋蛟螭怒须臾
互长虹关陕半呈露迳侧修竹倒石迸垂藤护相逢紫烟客日擊道皆寓斋房肉芝香石困松
花聚卜居志已得探幽坐成趣嗟我生劳劳入世每多惧梦繫毛女坛身远将军树日日对晴
莲尘容自生妒何年便结隣同住云生处

西山诗

会宿

小山丛桂多石路晚尤曲为有看山约且共花间宿清言转忘倦惟恐更漏促山鬼缘女萝中
夜媚幽独傍晓望城阙微雨淡如沐黛色从西来青光绕茅屋把臂共欣然林风托遐瞩

出郭

微雨既以过明霞互深浅出郭耳目易场圃纷在眼轳轳声哑轧牵牛蔓宛转野人烹葵蓼桑
柘阴中饭对此惜劳生厚生益远太息理轻策风云满前巘

摩诃庵

钟声出林表日上羣鸟飞松际幻空色花龕影微微幽人坐煮茗山僧朝啓扉欲问无生义难
同中上机

宿香山寺

溪桥蔓茑萝空香满风磴洄洄泉溜滴坐对前峰暝松覆塔下石花坠云中径高轩方偃眠冷
泠度孤磬

潭柘晚坐斋心

至人离有无泯然衆机挫修持苟无力鬼神辄覩破呜呼华严师冥心絶行作神龙不能见此
地曾孤坐我来千载後道风想担荷但恐纖尘隔虚空即点涴精诚发向往筋力愧孱懦白鹿
阶下行黄鸟花间过中宵梵呗闻肃然警偷惰

孟谷宿白茅寺用少陵赞公土室韵成二首挑灯细读不胜见猎之喜遂亦斐然有作

几日客中行却寻山中路王郎颇豪健恶马横溪渡入谷四山合上月中庭素解衣各有适散坐尽成趣烧药岩际访采芝云外步天地喻指马世代荒厨顾转惜对花草谁能度寒沍心依紫竹林手折青松树山情托猿鸟霞想变朝暮何处裊天浆仙人掌中露

一夕山中宿心乱梦难静晓来下山去日照青骡影回恋此林幽仍苦前道永苍鼠缘絶壁饥禽噪空井汗漫方远涉何能遂夙乘风尘渐杂逖心性自孤回上书罢游洛买田岂投颖家门有名山便与万缘屏种秫随西溪提壶任东岭希夷老子在千仞莲花顶

再宿百泉

重作蓟门行小作蓟门住西风昨夜来不辨泉与树晨兴益萧爽顿尔慊心素淡淡浮云尽渺渺飞鸿度牵牛寒有花葭莢晴多露境胜理自浹心赏目皆寓尚觉腰组烦未遂垂竿趣何处风鸾音徒然谢高步

杂诗

美人一端绮文彩美且良珍重惜剪裁藏之黄金箱一朝奉君子上衣下为裳荣华对知己顔色生辉光此心结三载徘徊立中堂何日理瑶瑟弹成双凤凰

艺圃十二咏阮亭先生命作【莱阳姜如农先生别业】

南村

何须远人境自无车马迹丛薄日晖浅柴门淡将夕时有清风来藤花扫书格

鹤柴

清音警夜半竹露泫花井山人晓开门肃肃羽毛冷忽向九臯飞中庭乱松影

红鹺馆

幽人生灭已孤馆闭空翠正有鷺王来听讲无生义尝托阳羨笼不换山阴字

乳鱼亭

种鱼莲塘下瀼瀼莲塘里莲塘朝复暮不住苹风起一半緑杨枝随风掠春水

香草居

托根在幽迳零落沍寒月春风来几时一夜空中发望望緑无停清芬动超忽

朝爽台

破晓石气青清晖损千虑晨兴攄远抱理策高台去遐瞩方渺然直到云生处

浴鸥池

藏机不肯来忘机不肯去泛泛緑波中悠悠淡无虑侧翅入深荷池上山人语

度香桥

花源吹樵风蒙蒙过溪水有客石桥畔空香落怀里只在水风间不辨从何起

响月廊

竹梧含夕晖风生碎珠玉不知新月上幽映修廊曲摇曳花林间禽声堕空緑

垂云峰

何处来孤嶂巉岩插花坞白云乍往还只在峰前聚苍苍园侧阴天池堕毛羽

六松轩

偃仰长松下渊渊心若水不知岁月深且恋清阴美山雨忽飞来涛声树中起

绣佛阁

反闻闻自性万有空氤氲稽首天人师宝阁栴檀熏一悟无为理不绣平原君

秋日同叶九来徐胜力冯圃芝访傅青主先生

秉彝有同好言寻高世士骑驴出国门语笑斜阳里郭外风景殊芦花冒秋水竟到野僧家喜
值於陵子吟呻惊老病语弱不胜齿闻言颌耆旧拭目辨乡里竹竈药火温梧井菊泉驶庭前
虚一琴床下闲双履羔雁空招邀儿孙看坐起太息各无言归途暮烟紫

题徐芝仙为笨山舍人绘三大士像

大海多波涛犹有大海见日日大海中波涛近洄漩此语虽亲切依然成破绽性海万法具寂

冥生变幻山河与大地由来此中建帆樯何所用渗漏即沦陷达者即安稳止在能护念徐生
妙笔墨写此具方便舍人独神解酬以三疋绢息心对应真不用求彼?载瞻三大士远离生赞
叹嗟余何知识习深油着面近始求解脱如拔骨中箭随顺罽毘畦浮沉宁汗漫苟未絶纖毫
即已成间断岂假鼃鼃力莫畏鱼龙难是法本平等恐怖自生患变相画师为画者色忽变如
此顛倒想徒然资笑讪愿共入无余乘潮到乡县

汪文升赠小楷五百字为别诗酬来美

颜籀法已远其意则未衰如何後世人竞妍失前规篆体大小分上蔡牵犬儿□书更简捷云
阳成导师中郎起陈留石室传何奇破塚者谁氏呕血穷藩篱琅琊学簪花少作悔已迟晚年
体一变方成龙虎姿江陵劫火然鷺羣荡无遗所以句曲翁申辨穷毫厘画赞存典型永兴独
得之此语具悬解不必皆能知汪子凿洪蒙独欲探希夷取势必纵横天马脱鞴鞢有如狂与
狷不屑中行驰岂知秘密藏正自山阴施二月山桃开小雨细如丝吾将雨中去倦听玲珑词
吾子何为者送我随斑骓题笺五百字木难赠临岐君家有汪伦送客昔如斯君情较浅深潭
水堪一卮鹿城有大尹此道颇精思吾过鹿城道盘礴互淋漓相见首相告不待他言辞善则
与人同大美吾敢私留取古情性庶几星云垂【鹿城大尹谓子文】

西城別墅詩十四首阮亭先生屬作

花枝近女墙岁月日潇洒虽复在城市喧寂非车马清风迴穆如知希和弥寡

石帆亭

风动袈裟角洪涛四溟吼如何不动摇片石土囊口为赏正定心添种菱三亩【放翁词石帆
山脚下菱三亩】

樵唱轩

采山因采真归来发高唱衣上烟霞斑杂坐无礼让身忘草木年心寄尊卢上

半偈阁

大辨本忘言半偈又何着赤日东边上素月西边落不必更求心四大空索索

石丈

与世苦不谐耸削自突兀霜明耿介性雨见歛?骨莫谓德无隣有人具袍笏

三峰

白帝家门山何年竟飞去毛女发精灵欲共天孙语纖月见庚方产药川源处

小华子冈

右丞禅悟人千秋生则傲每思茱萸泝一理欹湖櫂何意春城西犬吠夜如豹

小善卷

洞中过天地居然小善卷焚香聊宴坐独理朱丝弦溪割罨画水人畊阳羨田

春草池

池上茸茸色一卷离骚经谢客太荒唐幻梦不可听爱煞懒公语春来草自青

竹径

欹仄锦石路窈窕无凡卉去去緑阴中凉风动斐亶仙人何处来一万青鸾尾

双松书坞

读书谁与共于?两大夫更邀天际鹤营巢兼哺雏刚到春风候花飞酆玉壶

大椿轩

八千岁为春八千岁为秋灵根托天地世界真蜉蝣何人知此意只可问庄周

緑萝书屋

寂寂春阴繁因成元豹隐隔座花枝明到帘鸟声近风牀书卷开幽人本无愠

啸台

苏门有高士求怒不可得出水终大笑妙意诚难测为想凤鸾音崇台愿矜式

戴枫仲因梦作丹枫阁索题

梦是何人梦觉是何人觉梦觉本不二分别乃大错忆昔大卤行尝道昭余郭野水方弥漫杂
树正绰约宛然江上枫湛湛照寥廓何处寻步履且来渡略约永怀托蒹葭高卧阻猿鹤长安
翻握手有如偕宿诺云结丹枫隐乃效梦中作幽眇混金碧经营种花药邀人梦中游幻出觉

时乐日月跳两丸火风互磅礴世界齐指马四禅即五浊饮酒与田猎衆生妄卜度参万一成
纯背触两无着喜觉固为偏恋梦亦成缚梦觉俱不到可坐丹枫阁

送陈子文之安邑丞

维瓶处井眉纏徽不自如常有甕櫺患提擲困泥涂争似鸱夷膺滑稽大如壶亦自称国器方
托於属车嗟尔陈孟公洁清胡为乎长头伟容貌昂藏八尺余高才坐凭几口占百函书赠我
数尺牋藏弃等瑶瑜一朝佐山县不得纵号呼羞乞狗监荐甘受长官驱我亦放意人俗间久
湛浮索米向京洛归梦无时无谁知中条山赞府先我趋岩翠落官舍桃花明驿厨努力勿废
事小文难大儒春明我当来归访城南隅已无尚书期投辖真何拘看山过茅茨钓水寻菰蒲
宁知丛莽间正复多酒徒尧舜已千锺流传皆百觚使君好与饮持螯帛裹须倒载入厅事酩
酊双吏扶解醒鸯浆泉远汲风苏苏何用苦束缚约身如朽株长短各自裁官爵难强图封侯
谅有定岂必皆区区一笑送君去方噪城门乌

壬戌初秋寄于学宪

忆昔客长安软尘何浩浩金马亦陆沈只梦旧山好归来愜夙心岂敢怨枯槁读书开北牕颇
能任怀抱牵牛昨有花忽报秋风蚤惟苦奉饗殮不能具鱼稻怀人向天末此意复谁道夫子
真琼树偏能识凤饥乘槎历南海棹拂孔鸾飞仍闻浮丘山灵苗发芳菲安得五色羊从之弄
清晖秋空吹晴云一雁珠江去宁忘假羽仪殷殷托心素洲通荔枝红庵梦桃榔雨修敬久无
阶徒咏蒹葭句

古意上阮亭先生四首【録二首】

有桐峰山阳贞朴含清音无言难自明樵?将与临卓哉古贤达此际能幽寻削之以就器纬之
以成琴提携在捐弃谁能存此心

清清沅江水宛宛衡湘兰无人扬其芬幽谿空长叹一朝蒙采折芳香出林端流俗始知美羣
衆方解看咄咄非此人委弃春风寒

古意柬徐胜力

美人艳南国顔色如朝霞昨来耶溪上妒煞芙蓉花秦珠随月满越练逐风斜独慕孤高义今
年尚浣纱

秋日简阮亭先生

万象本寂寥一心丛百垢至人心亦无万象复何有先生金粟身方绾紫丝绶红酣天女花緑
醉麻姑酒妙思鱼脱渊闲情风在柳嗟我三生缘虚怀邀善诱将无瓊珞街当年旧师友文字

得闲居神龙困蝌蚪无学之学难还同证长久

送赵伸符编修使山右

凉风到庭户客子方宵征宵征亦何为日夕计王程斜阳见驺馭高柳迟危旌遥遥发鸿水天际方回濞井陘百战地残垒鸣飞鼙关路转崎岖野潦犹纵横一日七十渡石齿何丁丁大卤古仕国人文亦峥嵘君才本清真为帝张八紘重赖献纳力辟门招豪英酒醴与笙簧所乐皆国桢嗟我邀末契华实无可呈幸藉少淹留不与璠璣争有如明镜前山精先遯形知人受上赏聊慰十年情

简谢方山比部

牵牛寒有花芳草夕多露晨兴遵广陌凉风生高树谢公书成癖下帘理章句邺侯三万籤自插防错误我亦频过从饮河满即去十年困俯仰奔走念行路担簦湘阴宿买舟汉阳渡苦思十亩间缘墙种瓜瓠读书消世态射猎饱山趣如何事愿违又向金门住相逢益倾倒情语过亲故亦云鹿角关久负栖盘处春枝布谷飞雨壁蜗牛聚法曹羈鞅甚孤情少逸豫每值杏花时清梦往来数绘图当卧游退食辄长顾丈夫奋雄飞出处道皆寓正及身手健那得伴鸥鹭吾意早颓然山泽久沉痼贪看韦曲花笑蹶东郭屨谁能借车马君犹分坐具感慨成激昂风云莽回互座有谪仙人请为鹏鸟赋

赠姜西溟

南海有菖蒲一寸而九节曾闻安期生服之入寥沕霓旌随电转鸂轮逐风灭惟留阜乡舄遂与世人絕吾生久颓放世事等一呷愿言登罗浮竟访还丹诀夫子纯气守上善无轨辙着书白玉堂走马黄金埒衣被满天下大道岂庄列鹏运九万里五岳俯一垤每呼丹穴侣天浆共饮啜何日踏梅花千山望成雪

呈徐健庵阁学二首

嶰竹生太古坚筍一千寻外具苍玉节中有凤凰音何人解黄鍾律吕空消沉宇宙感太和采择出中林一吹八风调再吹天地阴元鹤一十二遥下阊风岑上叶云门奏中畅夔龙心

弇山有鸣鸟为世发祲祥其声中律吕其色备文章如何犹苦饥寥濶空翱翔阿阁无安巢飞飞去扶桑大海多风涛白日黯晶光耳目眩爰居抗咮鸣高岗夫子坐元圃琅玕纷罗将朝荐斋房芝暮陈金盘浆饮啄何足言高义不可忘览辉下千仞愿言耀虞唐

逢韩子用都下时方有婚事遂赠

前年芳草时游楚戒行李相候岳阳城同渡潇湘水舟移飞鹭上日暮啼猿起今春复里门马

上顏色温更向三巴去旌旆何翻翻岂意长安陌重来对霏屑尊酣新丰酒衣带峨嵋雪聚散真何常髭毛日已苍君适桃李期方为鸾凤翔屏间双孔雀花际两鸳鸯燕喜对晴昊差可慰怀抱而我踏层冰却望海门道会有好音来云中下青鸟

赠伯亮张司马

大运不可诘人生亦何常而我三年中春来皆异乡前年风雨交扁舟入潇湘经岁一归来又复客汾阳今更留海壖依然垂空囊有如白鸥鸟流浪沧洲傍久客道益卑随波空劳攘揽镜自踌躇髭毛飒已苍万事无一成中怀祇摧藏远慙荀奉倩近愧刘真长闲中观擣菹亦辄遭谤伤夫子坦白衷襟度何汪洋能容叔夜懒兼恕次公狂灼灼红梅开数为罗酒浆邀我赋新句冰绡墨淋漓醉中礼法踈调笑喧中堂小妓颇便娟新为墮马粧轻歌敛红袖能招双凤凰忽转风将雏人谓陌上桑一座尽倾倒吾亦盈百觴回觴属主人此乐殊未央耳热舞甘蔗奇气自飞扬何必求神仙远索不死方今古争贤愚过眼皆粃糠遭逢岂力取徒尔搅中腸君看阴与晴明日即茫茫

自傲

浮世剧茫茫日作求死法贪痴犹不尽又问长生诀余尤业重者痛愤入心骨晨诵一卷经频觉减内热誓心不退转洗涤到毛髮浮云忽尽时露出青天月

题汪玉轮太史看剑图

神物自可宝因之生爱惜何常有不平而始勤拂拭造化混洪炉虚无就形质晶光稍脱露已有通天色彩宁赤土发銛岂灵膏益百端销落尽万古一真实蛟龙秘精爽神鬼潜辟易比之君子心气应蕤宾铁

问橘

北地多寒苦橘树岂易生爱此华实好移植劳我情去年霜雪时结茅覆沟塍虽然稍凋落翠碧留根茎春寒既以过盛夏必敷荣其如世缘驱正月我已行生理果何如驰书问柴荆【屡从家问嘱弟霞料理橘畦】

过悔人

长安艰旅食望门足先敛惟有就君舍慷慨屡呼饭得匪王阳术获此数丰腆君家汉之渚种兰闻九畹梅花一百树日日劳望眼苦被微名累德辉难一览【君有览辉山房】不须盟雪霜【又有盟霜舍】且与计饱暖从此簿领间日日执手板方习士行勤难遂嵇康嬾我有文百轴零落失编纂感君意良厚许与事雕铲凡此怀抱真不同世情浅将无宫商应气味有潜感所嗟冰霜时别绪转难遣明日海门道悠悠自凌缅

题王秋史萃二十四泉草堂图

江南陆慧晓杨柳在池上此水即醴泉此木即交让关西杨太尉曾傍阿对泉三公何洁白四世能名贤吾子有草堂二十四泉侧不祝发祲祥但祝励明德

题汪东山太史南浦送行图

参差江上山微茫浦中树落日闭孤城幽人此中去去去入京国高名振帝畿一随丹凤舞不逐白鸥飞芍药号将离相赠春风里岂知兆龙头不肯兆龙尾秋草边绿春鸿天际斜乡关多少梦犹自遶芦花

咏梁史

南岳邓先生衡岭有居处自立两板屋聊取蔽风雨断谷三十年涧水服云母日诵大洞经修敬每伛偻恭惟魏夫人白日果临甬玉女三十人皆十七八许绦罗绣袿乘云集其所虽云有仙分笃实良所取求劳得则逸青鸟忽鸣舞香气满空山少日已冲举

集青雨山房咏几案二物

小匡庐

九叠玉屏风渺渺西江上如何几案间已具彭蠡赏犹好近香炉白云自来往

湘竹笔牀

参差狎管城纵横近书史斑留翡翠痕洁浣潇湘水合傍玉台人且载天随子

使院作

岷峨雪已消春波洞庭满愁心理归棹日望南风转湘兰不可佩孤居怅凌缅方讶雉登木仍嗟蚕在茧坚卧抛阴符强饮堕金盃人生出处非百事已乖舛贤哲多苦辛不能自黽勉蛟虻与鸛鹄忽忽皆过眼飒然衡云傍徒伤道谋浅

雨中登岳阳楼

白云满南岳随风来洞庭波涛仍接连坐失君山青却上岳阳楼愁心晚冥冥飞仙不可招残堞盘饥鹰我生何劳苦万里如流萍艰难思往昔谁能安心形遥攀野竹绿俯掇春兰馨千年花与草不独怨湘灵

城曲眺望

朝遵城南路白石齿凿凿林中一鸟鸣江上几帆落人家开竹扉樵子赴深壑塔影芳草间风来响铃铎

别王旦先

二月已将半江南杂花朵此时君不归辜负闲中坐君言三日行行李已包裹生平爱好春盛事肯相左烟水绿蒙蒙鸡笼迎画舸玉兰正高倩垂杨复婀娜莺声一万树处处听皆可东风动微波石瀨春帆簸我亦乐乘潮尘缘苦羁锁梦想摄山居未得纵江柁何日便南下夙愿一朝果更覓献花岩岩中畅容我逢君迭主宾笑语江风堕万事一微尘超然离偏颇

姜伯達过小圃看山即事

种荷荷长叶种竹竹生笋小雨忽然至风绿接修畛之子具远抱天机每相引列坐见南山白云正无尽肯作岩际行仙家多石廩

赠汪舟次柬豹人

今日汪顗榆当年桑柳州同一古性情不善干王侯小官就荒甸海气浮危楼却有书千卷造化穷雕镂朝吟祝其城暮閱剑水流黄熊看出没畎羽闻嘲啾云物任变幻烟花杂夷犹

圣代广八紘岩穴多冥搜声华久倾动公府先见收一朝京洛来风吹日本裘回首郁洲山远抛青玉钩天帝难骤谒金门还沉浮买书过慈仁聊作松下游归卧赞公房萧然何所求囊米行且尽笑对双平头繫我比屋居小过辄相留谁人与酒钱遂能设二亩焦获老狂客高歌方不休【时豹人先生亦寓寺屋】亦复就君饮谐谚杂伶优苦云处逆旅无人弹箜篌袂袂梦乡县儿语成温柔借问杜陵叟高怀有此不人生真何常聚散难预谋十年最结想此地纷相投珍重良匪易莫惜频劝酬明春知何如柳花吹作球更化浮萍去相思空悠悠

赠高澹人舍人

北风动天地银河五尺水仙人紫府居手携长春藤却

看芙蓉花才开一千层麒麟游灵囿凤凰翔高陵常有青童来送以无尽灯嗟尔抢榆鸟何如运海鹏

蚤春同苕文先生及舟次大可天生夜集王崑良大参寓斋

御河水始开御柳莺未啜鄂杜同羈栖春宵得良讌知交倾四海何必共乡县玉壶腊酒酬华

烛罗屏颤王公负奇气刚肠经百鍊学诗似常侍一为即高狷忘年谬推挹虚怀世希见胜侣
尽招攜清言夜忘倦说士甘於肉况复洁羹饌嗟余缝衲材难添补袞线早岁罹凶閔中年困
贫贱近更慕无为理欲日交战妄就承明庐终谢芙蓉殿还山构草堂柴门俯春涧芦笋过沙
鸥杨花掠飞燕梦结崑仑顶闲编高隐传【余尝拟为道隐録扩高士传之不备也】远望周
与召声华在天半

赠汤西崖

江梅有鼎实辛苦高人种委弃霜露间不作和羹用丈夫秉亮节得失何轻重且歌田舍酒暂
歇贤臣颂持此少年自百鍊始沉痛秋深石气青木脱天宇空披襟仗潇洒息念罢喧动历想
古贤豪大半出饥冻挥弦劝酒醪渺渺飞鸿送

韦左司春游

堤草忽改色鍾山佳气拥林暗车马喧江影人家动才见双屐滑渐觉锦袍重散步更迟迟时
花已堪宠

题周林於鸥塘种水图四首

朝畊塘上田晚啓塘上扉塘中一夜雨个个菱芡肥白鸥浑见惯不肯避人飞

朝见藕花鲜暮见藕花盛采花兼采藕出水香逾静欲问种水人红尘失名姓

朝买鱼妾来暮携鱼子往策策复堂堂渐见鱼儿长中有为龙鱼一夜风雷上

种水常苦肥种山常苦饥买山未必是买水未必非盍去丈人峯来往新妇矶

绎堂先生斋中拜观

御书恭纪其盛

世运适昌炽我

皇膺宝命一心周四海深居必恭敬圣明无阙事百职罢谏诤往往万几暇游艺乐清静读书
到丙夜万瓦金波映偶然事翰墨卓尔入神圣郁勃蛟龙姿盘旋北斗柄载观四大字心正笔
皆正臣莖侍禁掖恩遇过韦孟宸章示宠渥稽首再称庆光应千古垂事极千秋盛小臣田间
来蚁蝨对金镜瞻仰生战栗啧啧叹遒劲愧乏揆天才作颂施无竟

和别王东观

出門春草深入谷夏鶯滿客子思故鄉去去不能緩忽忽事行邁悠悠增別心天涯非所難所
難新知音倦我西山樵愧爾東蒙客百年如流水歡此數晨夕重損瑤華贈商弦風蕭蕭慘然
元灞水四月垂楊凋君言汾陽來我正汾陽去一帶藐姑山各覓題詩處

張水部修雷氏琴

制琴昔何人遺器留千載得者驚摩挲躊躇感時代宇宙浩茫茫日月沒蒼靄藏舟向大壑交
臂失所在所以古至人鍊精除粗穉斯琴固斑駁中聲托其內解散復膠漆重類開草昧曾聞
伐毛髓仙術肆淘汰修琴不修人吁嗟發長慨揮弦送飛鴻吾欲吞沆瀣

次趙城

向曉郭門北蒼烟濕流水岳岳霍太山青光落行李生平愛岩阿未得脫塵滓看山半馬上次
第藤蘿美黃金苦不成紫海渺萬里人生皆碌碌蹉跎遂沒齒遙期婚嫁畢曾孫又生子一笑
松雲前早圖飯石髓

玉溪宴集

竹林俯春潤林下東風吹人生無百年為樂須及時良朋接阡陌相招同來茲烹羊設醇醪坐
席歡更移耳熱行南原徘徊至東菑西望太華巔風雲變參差雪殘毛女洞日下希夷祠古今
几旦暮盛滿不可持酒闌吾已醉欲采商山芝

游風穴簡陸雲士

汝州風穴寺城西白雲里出郭芳草深得此林壑美栢子周四山桐花通一水香閣接幽岩僧
飯資禪喜石潭見空性澄澈何終始潭上新筍生潭下舊蘭紫谿風吹午鐘脫然謝糠粃相逢
采山人念爾宦游子

西園宴集二首【錄一首】

峩峩九峰秀人家山水半草堂誰結構幽思玉溪畔相過忘主客石上青精飯雲來松際陰泉
到竹根散美人雙荷葉嬌歌再三勸莫惜金縷衣浮生幾昏旦

簡方山先生

浮名久為累悠悠究何成因之河山陽買田事躬畊春雨苦不足澤雁紛縱橫始知飢驅緣難
與造物爭再作京洛游朱門羞將迎僻居守寂寞豈曰全堅貞夫子獨愛我始終無世情惟茲
孟秋月蜻蛚時一鳴騎馬特相過喜趨今朝晴大藥本無術至道思乃精吾欲溯元化同奏緱
山笙

将归中条呈阮亭先生三首【録一首】

玉露下庭树桂醕纷具陈再拜称百觴愿祝千万春世道日轻薄砥柱望天民庶几位台辅坐令皇风醇

题袁士旦小照即以别

二月来京师京尘何浩浩昨日凉风至只觉还山好之子云鹤姿读书穷要眇衣拂敬亭云酒醒新丰道匆匆得握手真快机缘巧风前倚辘轳意气切云表画师复何人精思入窈窕能写慷慨胸玉立傍修筱恨不携之去空谷伴清晓世事閱始深大道求愈杳不敢天下先苦县昔所宝愿以赠临岐坚贞永相保

香泉【香泉鹿城大忍寺泉也陈子文使君饮而甘之构亭其上名之曰香泉余过题诗遂以为别】

乳窟有蝙蝠千岁化为白微躯何足恋生理尚知惜嗟哉丈夫身昂藏俨七尺胡为竞贪冒天机日狼籍甚爱必大费珠玉叹轻掷十月鹿城道小憇越阡陌偶酌泉水香感慨风生腋将无无热池於兹潜远脉使君具悬解构亭着双屐银瓶汲铅华石鼎链金液倏忽得要妙疾如马驰驿更喜金界近宝阁镇潮汐碑古薤倒披经富莲横积【寺有隶碑甚古全藏一部积篋中】恨不谢尘累久住濯精魄纓组君正烦饥冻我方迫题诗留碧玉洒酒振归翮一水一切水浮幢何间隔大道本无负交臂岂创获两两素心存终古照泉石

春雪晓望

密霰夜已零杳霭漕河路朝来南浦望谁蹊东郭屨柴门半隐显静掩溪边树一鸟破烟飞有人雪中渡

古芝山房诗为刘敬亭赋

余家大河上门对莲华峰一日十二时常把青芙蓉欲作采真游幽怀苦未从之子中垒後五岳具奇抱早嗜神农书晚契商山好曾不一缣值已得三秀草灵根产何年其色古而腴一机妙出入元化与之俱毛女不敢餌留之千载余神物鬼所秘岂溷韩康市一朝不自爱实为君子至供之斋房中足办一生事

简方山谢先生

下帘坐清昼读书緬前哲如何寂寞人屡烦长者辙花林共偃仰风磴互蹙蹙烟霁春松暗鹤踏老槐折不知芳草意勾萌几甲拆万物机出入一法杜生灭朝来惠佳句清思濯冰雪海日上瞳矐高吟动寥泬

石潭夜泊

烟尽北斗垂明河淡秋影石潭泊舟处风筱娟娟静闲钟渡水歇宿鸟投林猛素濑见渔灯花枝坐中暝

赠竹垞二首

三日读君诗五日见君面不谒门下省已出瑶林殿浮荣何足惜世事本多变莫便学班姬秋风泣纨扇曲巷浮埃多相寻日已昃感君不得意犹有好颜色岂非十年内得此读书力握手当路岐不负昔相识

简楞香兄

哲兄瑶林姿高文久彪炳朝辞新安江暮入金华省承恩归屡晏日过花砖影幽斋富图籍下帘心逾静赋成金石堕书就龙蛇骋一字落人间已与瑚璉并颇惊裘马客造门日求请繫余昭穆分亲爱同气等风轩杯每接雨院烛常秉无学资高深有言闻要领池塘芳草时谁能和孤迴还当数过从花林鬪新茗

过介休郭有道祠见傅公他隶书中郎旧谏叹美不已纪以诗

繫马古槐下槐花石堂偏谁书有道碑古法蛟龙纏其文中郎旧书亦堪比肩嗟哉浊堂老纵横照秋烟鸿都蹟久芜帷幕留残鏤夏承谁呵护灵光犹岿然巍巍九疑颂托迹於神仙此碑妙接武絶响续千年梁鹄鄙不为颉籀或後先我来重叹息典型欣目前坐卧欲三日苦被尘累牵上马再回首孤鹏方高骞

题赵叟小秋【善琴】

共城有一士七十无心想家依啸台侧门开百泉上竹里每醉卧山中或独往但携一壶酒不知屐几两有时挥五弦万壑秋涛响我昔泉上游久欲就苍莽买山苦未就徒然增慨慷相逢感夙心且与共偃仰

白石精舍

初日寺门暄微风塔铃响岩冰余滴沥谷鸟悦深广樵声来远壑竹影交银榜寂寂下庭阴回身礼金像

兀坐

兀兀寡人事寂寂忘心想闲临庭户间坐看春云上竹树颇阴蔚烟水亦沆漭莺声过乔木鹤

子下菰蒋忘机复何言遂已窥象罔

过巢溪

巢溪清见底白日如擣菹水禽各鸣唤两两机心无残雪沿溪流转入汾水隅天气渐和柔蒋芽生紫腴感此时序迁况复景物殊古人不可见对兹心踌躇

过孙向辰书屋

几日不相过新笋已成竹竹间两黄鸟飞遶读书屋我来北窗下爱尔诗盈束何当携素琴共扫清阴宿

秋日即事

闭门赋闲居陰雨连朝夕今朝晴稍开遂至原南北汨汨碧流驶漠漠秋烟织登眺颇俱宜欣赏良非一白云忽欲尽了辨前山色农人腰?归穉子荷蓑立

拟古

春风到庭户百草皆知荣此心不如草寂寞从中生晓起闺房暗罗衣寒盈盈故人在他县忧喜难分明婉彼燕赵女把酒劝听莺华筵不能久反增离别情念此转怜惜何事客中行

劝酒

东海日曛曛光辉遍林藪借问曦髮翁此日何年有连朝北风恶冰合直沽口却忆海上山山中雪应厚黄精苗有无欲鬪但回首不如层水下生鱼比纈手凿水下丝网素鳞灿堪数荐之白玉盘盘鱼色难剖请得鱼一头可劝酒一斗一斗复一斗醉倒洪崖友回看东海日又上牕前柳

铜雀妓

铜雀台漳河岸歌舞出彩云散可怜人君不见不见奈君何漳河扬素波日暮悲风起秋声何处多陵树晚烟织松檟纷无色帷幕栖寒阴君王梦难识愿将妾私泪啼作西陵雨何以至君前野风为吹去

莲洋诗钞卷一

卷二

钦定四库全书

莲洋诗钞卷二

蒲州吴雯撰

七古

昌化寺观吴伟画壁长句

晨兴骑马缘山岬初日照眼明金铺石磴无人散松子入门茗薜追清娱何人善绘江夏吴应真五百穷规模其上调御古丈夫诸天剑佩纷来趋袈裟一缕覆大地三大劫等翻轳辘无所从来亦无去始终不异难覩???两壁磅礴尽意态凌风蹈海神灵俱鸚鵡塔向指尖出猢猻藤傍眉端扶作使天魔如使奴狞恶慴伏情恬愉公无渡河胡为乎只愁冒挂摧头颅何事毒龙肆吞噬乃从腥吻结跏趺缁素膜拜惊且呼毒来慈受毒啜嚙人间横逆岂不尔参互比拟皆无殊鹄巢於顶膝穿芦天花落处成氍毹如此定力合赞叹总持妙湛将同途金锡汾阳示激劝圆相洵仰开蒙愚西来之意岂尽此令人惆怅生踟蹰山水暴涨能径渡髻珠道人斥其诬幻化由来亦轻渺忍俊不禁堪胡卢自乳生酪酪生酥酥分生熟成醍醐搬柴运水神用足粥饭既了涤鉢盂贪子得珍乍惊喜终非长者安其帑细观兰那见奇特所诣已善犹有虞将无显异尚惑衆波提木叉还自逋即如延陵此绘画烟丝雾缕真难摹当其经营备惨澹可悟万象由虚无识心达本乃至要莫眩五色随模糊去爱有如摘悬珠一一摘尽爱水枯圣凡不立是何境性清静故超瑕瑜

陟岭赴潭柘寺作

一岭郁迢嶢横断潭柘路香光庄严渺何处奋力登蹶顿忘疲岂云济胜全无具忽然涌出青莲花千峰万峰不知数人在青莲花里行僧在青莲花里住岂知胜地限咫尺功力未到终难遇宝阁崔嵬入云表石龕 幙开珠户雨後争看修竹林鹤来忽动青松树珠泉滴沥递空响鸭脚甘蕉?行步斋厨供饌衆花集长廊梵呗神龙护嗟我劳生慕栖隐对此真令屏尘虑安得早谢区中缘静息西岩发深悟

蔡州道中

鸿邠陂南蔡州道千里黄云漫秋草白龟浮波天茫茫瑶林垂实珊瑚小汝坟客帐闻荒鸡犊车碾破花沟泥倡楼雁断思不断珠灯照梦沈玻瓈池 謹鹅鸭冰雪改岂为封侯蹶重垒愁结胎簪走玉龙横出南徐入东海

赠杜蔚门先生

郎君谷口花无数栖岩寺底竹千亩幽人来往花竹间心与白云淡无取避世即是鷗冠子忘机还应汉陰叟虎溪醉客欢把臂龙藏禁方秘悬肘读书不厌细如髮作字何妨大同手将烹赤凤喜鼎温欲采黄精愁雪厚药奩紫芝兼丹砂世事白衣任苍狗汞叶旋看铅花生丁女正藉壬公守嗟余久向鸾鹤羣劳生空作马牛走长沙近复忧壽命张仲恐难终孝友却仗我翁常慰藉未可志气便衰朽昨日东郊迓春仗一夜南园变风柳青旗犹欣重到眼花胜宁嫌亦插首从此相过踏芳草或可雨留剪新韭石镜舞鸡对乌几湖船射鸭拍铜斗人生适意聊自足鼯鼠饮河量所受阿谁能解踏踏歌为翁一劝薄薄酒

贻洪昉思

洪子读书处静依秋树根车马何曾到幽巷肮脏亦不登朱门坐对孺人理典册题诗羞道哀王孙长安薪米等珠桂有时烟火寒朝昏拔钗沽酒相慰劳肥羊谁肯遗鸱蹲呜呼贤豪有困厄牛衣肿目垂涕痕吾子摧颓好耐事慎莫五内波涛翻屈伸飞伏等闲在总於吾道无亨屯前有万年後万古刹那何用争鸞鯤君家西子湖瀾?交文鸳湖上诸山太苍翠歛从海外飞崑仑掉船载酒便亦足天浆手挹神腾掀少伯百计乃得此胡为懊恼嗔山荪红裾锦髻过萧寺虎靴桃杖投烟村颓然醉卧藉芳草忽忽明月升金盆

海天长啸图为张辅公别驾题

海天浩浩何端倪海风吹水如玻瓈中有高人洞元化襟期广达无町畦眼前万境不能惑天外三山如可跻一声长啸彻云表迥然鸾凤千虹霓青松鬱屈动鳞甲丹药恍惚存刀圭岁月烦囂任扰扰生平意度常折折道服身并九臯鹤酒杯手捉骇鸡犀童子葫芦何所挟兰台叙传或相齎况有神驹称迈种七日超母惊驪奚桂枝结实兰芽茁一堂三世荀陈齐从此门闾益高大上林珠树容联栖繫余卅载托末契杯铛横搅金留犁阅阅方看韦兼杜朋好还次阮与嵇今日重过美爽健气清貌粹频招携芍药堆阑间玉版槟榔满斛交金虀何人绘出高世姿独立海畔岛屿低一时相对意飘渺图中座上眼欲迷朱霞南映北海北青裾东拜西山西古今何似蜗角触世界忽如鸿爪泥题诗掷笔且大笑安得玉虬为驷随风鸞

韩周京司马招集郑谷山园看牡丹次晨遣力送花报以长句

庠陵醉翁称好事特譔洛阳牡丹记著作仍是五史手君谟书法益精致如何爱重反诋讪瘦木比拟失伦类极美苟与极恶同大圣阳虎皆偏气其中惟有释花名撮要分疏颇详备丹州延州各有种粗叶细叶总堪识九蘂真珠态最殊倒晕檀心格尤异再三细读转增感瞬息繁花有迁易宰相园池盛桑麦【魏仁溥花名魏紫】仆射駉馱香衔轡【张齐贤花名青州红】品目谁辨军容家【唐末有中官为观军容使者花谓之军容紫】溪山已改龙门寺【唐相李藩别墅在龙门改为潜溪寺谓之潜溪绯】中条之麓多水竹其间卉木亦妍媚将军旧墅君能守丞相家风俨不坠谷雨已过花尚开爱客移樽花下醉朝来折枝还赠我鹿胎莲萼

今何愧却念此花护持好遂使颜色免顛悴雨露虽同天地力剪伐实恐樵牧累当年此花载本草风俗何知宜与忌褒斜道中推为薪岂料山河表祥瑞歌咏初见宾客诗【梦得有咏鱼朝恩宅牡丹诗】称述久入康乐议【灵运言永嘉竹间水际多牡丹】极盛必待开元後珍卉难强时未至【自唐则天後洛阳牡丹始盛】呜呼万物遭逢无不然题诗驰谢发长喙

宁阳周太师母年九十余善飮而健喜而咏之以当登堂之一拜也

太母年九十康健不用扶将无有道然岂但天秉殊太母於吾母其义犹为姑小子别庭帙今已九月余梦想念慈顏惟恐色不愉忽闻太母健其心怡然舒太母九十既如此吾母七十必安居归述太母吾母前即以太母为母娱吾母闻当拜太母遥遥东望整襟裾太母有道授吾母临风专望北来书

里中送韩翌宸【有序】

【癸甲之交识翌宸於长沙幕府意气倾倒欢相得也自此离合之际动历年岁升沈之感更复恍然庚辰嘉平再过蒲坂把握讌欵欣戚交并甫获申岁寒之心诂遽作春明之别依依杨柳青未盈条惻惻离亭红翻掩袂敬赋长句聊当歌骊凡我同人皆宜奏雅】

当年扁舟青草湖寥落江上称穷途舫舟更傍黄陵庙把酒长吟兼独笑烟波风雨浩茫茫无衣客子垂空囊鷓鴣声中归不得踟躕花前神暗伤伊时中丞开幕府再拜军门色先沮岂知延礼出寻常留我华堂迭宾主翩翩公子冰玉姿横槊江头工赋诗座中更有文章客李白【岷瞻】罗含【宏载】皆在兹弹指年光岁复岁盛衰之际心如醉岂但客子如转蓬叹惜繁华已迁易美尔公才回不同步武方追旧鼎钟官阶不失中郎贵云朔仍留万石风可奈繁霜忽又早鷓鴣一鸣歇芳草世事还惊掣电飞人情更讶狂澜倒昨日新从浦口还家门却比客中山雪中鸿爪虽难定海上鹏云终不闲昨日腊雪暂相驻今日春风又复去盘园梅蕊恼人花大河杨柳伤心树更念高情为我留金昆玉季情绸缪取欢便可鸛鹄舞贯酒不待鸛鹄裘刺促无端道傍别青丝玉壶转愁结鸛声犹冻谷口云马蹄已破中条雪噫吁嘻人生聚散本无凭但能努力终飞腾檠戟原是君家物十年仍可大中丞

放歌寄赵秋谷太史秋谷罢官余在山海未能走送特寄此奉慰兼寓勉望云尔

大海为莲池衆山即莲花天风万里肆排荡万柄青玉交杈枒千艘千蜻蜓一岛一虾蟆忽然夜半赤日上波心飞出黄金鷓我当此时饮一石褰裳濡足思无涯恨不即携秋谷子把袂浮拍吟琼霞三日得君音使我情咨嗟知尔纵饮罢官去归途雨雪车哑哑京国急来问亲旧忧尔负气神参差岂知渔洋北来正遇尔道尔胸无芥蒂顏貌嘉眼前纓冕如脱屣猛风吹尽恒河沙噫吁嘻人生万事何时了朝起营营暮扰扰官爵九迁仍苦卑黄金千鎰终嫌少吾子赋性殊不然弃官无闷方少年得失荣枯本闲事谁能不动天中天噫吁嘻秋谷子大奇特不负当年好相识力大能持震电惊心空不受天魔惑噫吁嘻秋谷秋谷方汝行恨我未能饮汝以浊酒劝汝以素筇尔去且复藏其名精金大冶百鍊坚贞

九重圣人真圣明他时再起东山谢方知尔可付苍生

赠陈其年

渔阳桑叶落寒风遂萧条美人远自江南来手持明月簪琼瑶乘秋理镜发高咏和以鸣凤秦
台箫倾国倾城谁第一美尔荣华艳朝日从此承恩入蕊宫宫中行乐何时毕

槐石歌为佟俨若赋

中丞清白世所无罢官便同山泽癯一朝卖宅怅无居假屋聊取安妻孥公子矫矫才气殊鸾
翔鹄峙羞泥涂移家空载五车书下键却扫追清娱翻喜新堂槐?铺当门怪石蹲於菟解衣盘
礴兴不孤间有好事来提壶长安酒肉厌屠沽高楼燕笑罗揔食鴈而美闲且都明灯广厦
张 璩公子寂寂胡为乎据槐倚石仍咿唔嗟我四十悲头颅尚书朝请计总迂胡不归去软
尘俱松风真负青山逋过从数坐青珊瑚摩娑石丈称吾徒闻君指日江南趋犹为饥遣争长
途回视此乐不可图况欲高馆吹笙竽呜呼廉吏可为言何诬不见楚相之子负薪啼路隅

赠匡山老人郭翁臯旭

匡山老人齐得丧髭髮萧骚骨肮脏读书万卷眼不昏饮酒一斗神犹王五经腹笥何便便蹉
跎一官失少年宰相岂肯借车马司业何曾与酒钱竭来燕市屠沽饮醉听琵琶夜忘寝节鼓
常敲翡翠盘翻杯辄沆葡萄酒锦千锤百榼气转豪客帐犹悬旧宝刀起舞身摇谢蝴蝶和歌声
乱郑樱桃忽对长空见归鸟自伤为客何时了金马门前再住难春明待走邯鄲道

宋观察牧仲过海门见示悔人早春倡和诗依韵赋赠

忆昔少年尚驰骋头颅四十愧朝请已知不是宰官身自分常依居士岭腾掷休任猕猴狂精
进当学狮子猛其如结习爱文字有类柔稊发枯梗丹经一笑帛裹须皂?几颓墨淋顶惟信胸
中少鳞甲峨帽雪水一千顷食贫十年成远游世态低昂暗知领本性往往受拘缚夷则镜困
蛟龙井入洛安得比邹枚怀沙只可吊屈景公也威凤知鸾饥作歌伤我羽毛整更念琅琊及
安德殷殷慰藉常记省细雨空怀野寺梅【客春雨中阮翁约看花善果寺】炎风几忆岩关
杏【方山有杏村别业在鹿角关同人皆为赋诗】谁知羈栖东海边公来同啖云门饼兼云
胜友朱桃椎衙斋鬪韵夺香茗携将佳句争上驷贪诵偏宜春夜静才力韩孟各分疆交情卢
马同一矿归来长啸惊神鱼月明棹拨玻璃影我亦蚓窍发蝇声却令珪璋束藤屣公言明朝
当早发使我延望愁日永举首高天雁正过岛屿苍茫晚犹靚移情是处感成连尘虑喧嚣一
时屏故人已去乡思深梦入通天见沈炯低头重懣起灭心水本无波木无癭

题张振宣行人小照

君家别业招贤里几次寻山探石髓檐前每宿太华云池内常分玉溪水溪边杨柳何毵毵水

色空明天蔚蓝闲来把酒溪上坐鹭羽扇子挥晴岚更喜青衣能解事窈窕临风柳边侍湘裙小蹙玉壶倾美鬢不动金钗膩美君斜倚黄瑠璃【簾也退之诗一府传看黄瑠璃】满酌天浆对水湄真珠波溅声喧处菡萏花开香到时繫余溪山纵游衍涧东七听春莺啭【余住永乐凡七载】花坞难忘载酒频竹林犹记题名徧今日重来东海头久烦白饭兼青刍画图琴酒转相感将无仍是西园游君方置身在廊庙翠翹枕畔催朝早安得依旧风柳前迟回高卧爬仙爪

题文伯仁山水卷

最有江南客能画江南山江南山色綠於染人家住在青冥间溪桥横亘幽人渡渡口苍苍隔烟树多少楼台春雨中山鸟山花自朝暮古寺朱墙倚石屏雀离高映锦帆泾千株松下无人迹只有风吹九子铃

東江解州辰六

中条山下来时路几日杨花作春暮马上频看戴胜飞花开旧馆应无数今日仍从山下行花枝低亚宛相迎南邻酒畔定相待况复堦前新笋生新笋生时如碧玉相间花枝照茅屋篋里亟寻荷叶杯案前再补阳春曲其如垂橐意萧然遥念花枝诚可怜归来不用賒春色只向先生乞酒钱

有题

花枝蒙蒙遶金屋蝴蝶一双两双宿风歇香轻归镜台曲屋罗屏画生綠美人晓起幽梦阑啼鸟隔树雕牕寒见春欲问春深浅自卷珠帘带月看

吴门逢春感赋

少小不自立生计苦依人梦怯广陵雨神伤扬子津扬子风高不可渡行人尽立江头树日落江城早闭门草草相随片帆去才过京口是丹阳晓起推篷船满霜寒雁萧萧回远浦啼鸟哑哑立残杨残杨不可挽嫋嫋凌霜散我欲维舟一问津长条未系风吹断吴关渐近吴语多舟人来往皆吴歌可叹相逢不相识匆匆回首各乘波乘波去不已同棹吴江水江客方过野埠西郡楼忽见青山里城里城外梅花新官街不雨亦无尘乌鹊桥边窥扇客锦帆泾上卷帘人闲情已说风光好酒船日日阖门道自恨黄金不绕身转觉无顏对花草归来愁坐晚钟闻拂拭吴鉤到夜分江上久无严仆射月明谁是谢将军追维始道此行误翻自来时想归路江山日远路日长况复飘零岁方暮镇日思归不得归江南转眼又芳菲可怜谬逐稻梁客空负山中萝薜衣几回远望百忧集归来又向官桥立黄鹂巷口草青青厌见春风等闲入百岁能胜几浪游徘徊独倚仲宣楼丈夫事业须早立莫使蹉跎成白头

桐石咏赠佟霞庵使君

山中早约桐花
花开时节桐乡来
今年桐花开较晚
三月无花叶犹短
而今四月清和时
桐叶生肥花满枝
使君爱种双桐树
傍石栽桐拂烟雾
桐乡士女寿桐君
桐花桐叶何纷纷
我亦特来酌一斗
为祝桐君三不朽
半醉不醉笑靥红
如珪桐叶含清风
东山月上暮天碧
醉把桐花卧桐石

关门还戏和赵旦复即奉答

雪中鸿爪真何常
空惊岁月去堂堂
惟有幻梦留影响
海若蹴蹋鱼龙乡
日暮惯见关塞紫
冬深颇讶边云黄
结骑同过南海上
海天万里空青苍
涛波下瞰蛟人室
岛屿髣髴龟兹王
中宵赤日涌金液
羣陰消尽腾纯阳
徘徊兴尽仍返辔
谈奇指划思源庄
【思源庄去山海关五里
乃张水部创立】
只肩下酒可一石
醉後笑语闻琅琅
晚来閱伎围红烛
 毬咫尺移金阊
晓起逐轡更数肋
猎人四会如堵墙
冰上守狐手指冻
雪中射虎马尾僵
树精闻盗初祖履
卢令称继风人章
紫貂檐榆贱难着
曹风且咏麻衣裳
有客更道悬阳好
摩登迴在青云傍
闻言疾驰铁围底
鼓宫应宫商应商
盘马万山石确荦
兼葭何处愁中央
到来一洞通天地
维摩十笏难丈量
石塔宛留锁骨蜕
百宝争献波斯装
如此跋涉亦不恶
葛屨省怨来朝霜
或述团云在深谷
僻壤未惬居人肠
诘朝束缚勉一至
忽如豆食更精粱
七重行树四山列
九品莲羹双峰藏
苔龕宛转任鹿女
乳泉窈窕留天浆
莲洋学人怯亦勇
木屐甜雪随腾骧
扞萝直上九千仞
崑仑絶顶倾余杭
欲骖鸾鹤访瑶圃
恍骑麒麟临大荒
挥手待挽不周柱
濡足直踏朱雀航
纵横寥廓我非我
睥睨今古狂真狂
岂知胜事难把玩
归来水浒违山冈
中厨清冷鼠堕瓮
高斋索寞龟支床
椎髻幸有举案孟
赁舂宁晒牧豕梁
寄语天魔老鸾崛
禅悦虽美输糟糠

江楼忆弟

楼下江水何其深
对江山色常若陰
八月正有梧桐雨
千里归客愁难任
鸚鵡洲前秋草绿
鷺鷥双双宿
只有衡阳雁一羣
恨不同飞声断续

谢公杏村读书图

鹿角关前春水流
鹿角关外鸣春鸠
杏花千树香十里
花开常护读书楼
我爱谢公好才调
读书万卷犹嫌少
每到花时只读书
总有落花常不扫
几年腰组入长安
读书依旧看花难
画师为写读书处
宛听伊唔花未阑
余亦辞家一百六
花里逢君帝城曲
见画为君色惆怅
关前谁锁读书屋
君言万事皆等闲
读书岂必家门山
画中看屋眼前是
但取古字窥苍顏
我闻君言转增喟
境不可执书亦碍
堂上读书笑斲轮
糟粕何如醇酎对
犇路连朝风日佳
出门况有千杏花
读书争似花前醉
且掷残书入酒家

题姜郡丞画扇

久思中条结茅屋
因树为堂映新綠
树杪三叠五叠山
堦下千竿万竿竹
使君骑马山中来
手攀嘉树心徘徊
高情待蹑崑仑顶
天半流霞酌一杯
繫余采山愁日晚
白云深处闻鸡犬
丹竈

方覓葛稚川石髓难逢嵇中散云间高士才情妍能於笔底生云烟梦回白苧城边路写出绿
葭村外田【曹平叔坦华亭人住绿葭村即以自号因画此景】田际鸣鸠唤春雨望杏瞻蒲
人作苦行春端待使君来江北江南遍歌舞雉尾尊生薛淀湖九峰三仰望模糊却从一幅云
林画兆作文翁善政图

题蜂子蝶花小景画扇

我闻罗浮山蝴蝶如车轮麻姑仙人据其背凌空笑看三春花又闻神人探道秘吐饭成蜂等
游戏而今蜂子作花心花耶蝶耶何同异画师狡狴太无端小草红蓝锦作团司马心情能坐
啸且拂齐纨操猗兰

送孟千一赴铨

新笋如簪荷如钱往来醉向山堂眠山堂主人修静业爱我亲煮堂下泉新笋如林荷成盖主
人求官历燕代林中有竹池成莲主人不在山堂在看竹虽谐野客情酒酣谁惜狂奴态主人
行色太匆匆堂前酒酌珍珠红回尊再劝主人饮明日山堂烟霭中主人分符作民牧亦伴行
春双白鹿判牒宁忘一顷莲折腰应忆千竿竹我傍汀洲采白苹君今圭组已荣身他时独往
山堂下还酌山泉忆主人

莫亚夫先生赠我临帖二册皆山陰父子书也用笔特妙几欲乱真敬报长句

亚夫先生笔墨殊贻我临册今所无山陰父子有穀率只手双攫金仆姑转使有类鹤引吭回
翔宛似鷹顾雏雪中鬴脱活鵬鸮海底网胃生珊瑚明艳春风媚桃李澄澈秋水排擣菰忽尔
遶柱蛇激电忽尔曳尾龟负图公孙剑器太熠燿宜僚丸弄争须臾鸾蹲凤跼各异态龙跳虎
卧皆同模钗脚漏痕称晚近惊沙蓬振迫前驱技痒难倩麻姑爪狂笑欲裹司空须吁嗟先生
胡为乎行年八十藏菰芦早有文章惊帝阙晚随鸥鹭浮江湖空传恩泽在民社桐乡酒肉杂
笙竽有时朱顏如醉饱【朱邑为桐乡令有惠政後民立祠祀之而邑於祀日即而有酤顏】
儿孙满眼终难餽嗟我半生久零落知非年过仍顛愚今始登堂拜父友丈人行辈情急输入
门惊见形貌古咤叹不已天为徒化肠为筋理则有【神仙化肠为筋故能不谷食血化白乳
也】链身同鹤道岂诬【李翱赠诗云链得身形似鹤形千铢松下两函经我闻大道无多语
云在青山水在瓶】休讶先生山泽癯龙门传记列仙儒朝夕过从命饮食雕盘罗列笋与蒲
江南橘剖黄玛瑙潞州酒滴红真珠炰蟹脍鲤无不有折项真见鹅鸭俱温言獎勉意良厚憑
几含酤兴未孤酣畅不觉发清辨口道尧夫经世书先天後天在指掌太极无极非画图修身
更进参同契戊巳刀圭研上虞小子闻之醒聾聵宛丘不负循墙趋腊雪已尽未归去又见春
风来坐隅生平有愿皈道业扰扰尘心难骤剷醴陵终愁筋髓冷【江淹封醴陵侯文集中有
恐筋髓衰冷之语】长沙早恐年壽徂远游辄思隐悬溜垣阙竟拟修蓬壶结习无如障文字
世缘那便抛妻孥筋力柔脆更自晒仔肩大道非凡弩毕万七战全牖下【毕万鄙夫也七战
皆获死於牖下有马七乘见在】单豹岩居逢於菟十杀一人歟相戒饮食牀第翻畏途人生
福厉那可定趋避益令疑难摠离垢还期効慧斐【刘慧斐号离垢先生构离垢园洁齐修佛

得证善果】忍欲未得偕林逋姚察读经悟空寂【姚察姚畏谦之父读佛经悟一切空寂】
孝先蔬食沃醢醢【徐孝先蔬食信佛後证果】桂父桐君迹有据【桂父服桂得仙桐君亦
古仙人也】金庭石室途非迂间关未透成怅望麤鄙不尽增踟躇右军游目眺汶岭大令鷺
羣归崇虚优劣未可卑饿隶腾举髣髴皆仙都自昔文人慧为业於道为近乳酪酥执册再拜
重请益先生教我当何如

同阮亭先生坐方山司寇匏斋论诗先生遂为书古今人名句竟二长幅喜而作歌

麝提先生才调奇风流真具天人姿文章磊落妙一代作字更欲追繇羲残墨如金自珍重丰
屋不取珊瑚贗贵人往往多责望迁延终以不能辞昨日偶过谢公宅琉璃砚匣盘蛟螭先生
入门一笑粲高斋茗椀浮春枝谈艺辄抽筒编乱运腕时见精神披岂因槌几便点缀恍如练
帔呈淋漓跂脚飞洒露敏妙羣鸿髣髴游天池突兀拙迸冬笋箨娟静细引春蚕丝遥情忽述
大人作随意闲写家风诗须臾神明焕两纸歛然修禊山陰时春蚓秋蛇态争出家鸡野鷺言
何卑嗟我贫困走京洛身无长物空低垂一朝捆载得至宝木难火齐胜携持世间耳食那辨
此公殆天授非人为碌碌门簿废时日今朝不负千秋期归来什袭俟终古会有後日扬云知

祖龙行

鍾山已凿紫塞崇鳞鳞日照阿房宫芙蓉销尽金人气宝历从此垂无穷灵药迢遥问秉海千
秋万岁期常在此生不拟禅扶苏那知身後防胡亥昨日徐郎有报书帆檣将近羽人都何事
君王不相待輶輶东来杂鲍鱼却怪宫妃未偷药至今犹挽莲花索

乡宁山城即景

山云啓新霁林屋含清晖风吹两黄蝶时绕山楼飞老农向烟且驱犊溪女背人犹浣衣

次青县题壁

去年九月长安来鲤鱼风起船旗开今年三月旧山去马上绿杨掠飞絮旧山风景复何如昨
日家人有报书当门万里崑仑水千点桃花尺半鱼

简谢赵章侯将军立春日招饮

今日立春春已入檐际春风便习习将军高宴启辕门斫绘燔熊衆宾集当筵百戏间瑶笙急
管繁弦绕画屏玉璫频倾千日酒金盘真压五侯鯖将军名阀湖山上玉季金昆坐蓬闾气慑
千夫意不骄书探万卷神方王秋来秉钺大河滨蟠花锦映玉麒麟说礼敦诗本儒者轻裘缓
带真天人繫余珠幢瞻紫气为君揖客增欣慰岂但投壶致倍高更看结袜风犹贵今日之乐
乐如何千觴在御欢情多愿持幕府霜毫笔写入军中朱鹭歌

酬赠郭乾为时同客西谷侍御使院

淮海郭公来夏五使院相逢觴屡举文章不减徐常侍腰腹大类庾开府酒後常时舞鸕鶒筵前即可赋鸚鵡开口便能取富贵立谈早已惊公辅其如文战久不利尚尔迟回困环堵跛驴大笑走南北行卷沈吟閱寒暑来年决定夺锦标一簇三重洞铁鼓嗟我垂老百无为图养八口少百亩衣穿剩有皮骨存履破难以干将补不思仙侶追鵷鹭但析田舍迎猫虎赖有彭城柱史贤天涯能念金兰谱与君同味学士盐青眼可以计出处君自青云我白云?拜木公谒金母待尔功成身退时相寻再与商终古

题遂闲堂赵松雪画图

忆昔驱车北平道停车特谒夷齐庙阶下偃松亦太奇就地蟠拏助清啸今日堂中作画看吴兴妙手写生难更画柴桑老处士归来独抚恣盘桓堂上主人柴桑客官职不同性情一归欤久自称卧松取意何期画中得我来堂上樽酒同海涛髣髴闻天风不须放笔为直干且看随地蟠苍龙痛饮看图还一笑笑问堂中卧松老鸥波笔墨北平姿毕竟精神是谁好卧松捧腹当我前松画两皆无间然画松早写真松意真松还仗画松传我对画松更长喟松画非一亦非二与其募直触风雷何如螭屈留天地此道由来应不穷南华之妙惟环中君不见修干多裁作梁栋丹黄反作山中梦愿君看画更怀真休伤材大难为用

题张鲁庵方伯清潭印月图

风潭百顷如倾银潭上明月如金盆月华莹澈浸潭底如琉璃合无纖痕有人斋心潭上坐心怜净绿不忍唾孤情恰与白云闲万事都如飞鸟过潭上卉木何纷纷青藤红萼无冬春皎皎方看潭上月兀兀已忘潭上人潭上月华潭下水湛然一派空明耳我心正与水月同水月与我何彼此嗟余平生心未降水中索月增劳攘岂知已为第二月标月之指难禁当先生事事有真契语默从来少凝滞即看触处发天机写向图中已余事今日当机惟嗒然清波弥弥月娟娟等闲莫向潭中覓一月还教遍万川

题刘鐵龕负剑图册子【有序】

【盖闻善摄生者陆行不遇兕虎入军不被甲兵兕无所投其角虎无所措其爪兵无所容其刃鐵龕志於道久矣岂尚资一剑之利哉然昆吾冶铁炎烟横飞滓秽尽鑄纯鉤乃精淬以鸕鶒发为莲花绿龟蹙鳞青蛇弄珠陰阳刑德混於杳冥举之无上抑之无下运之无傍漆园不能说司空不能窥铁龕之意将无有取於是乎於是刘子倚柱而嘻曰有是哉遂短咏记之以复刘子】

文采带利剑古人称盗竽刘子岂其然将转轡轳珠簪冠斜披日本裘背负一段青珊瑚世界不平心地心中那有不平事眼底皆付晋人映筵前肯假公孙器知勇为锋廉为锷大匠无端代求斲总然千里不留行那见龙鸣胜屈螭宝鼎温温火候匀百链转成无价珍风胡无言

欧冶死从此莲花有化身
渊默匣中生霹雳负之而趋
诚有力动静须教山鬼惊
行藏那使天魔识
徒倚休嗟行路难
长空珠斗夜阑干
安居始信真无事
多少痴人画影看

此身歌柬韩元少先生

此身谓非我居然耳目能明聪
此身谓真我呼吸不存俄生虫
臂弹尻马宁异说鼃蠃鵙掇捐
雷同世人纷纷转茫昧
因之蚓窍争蝇蠓逝者如斯叹
川上无言本自归鸿蒙
明明此意在邹鲁
其如雷电乖盲聋
雕刻心思养口体
寻常贪恚成伐攻
福轻於羽不知载
百年驰骤何终穷
美食投箸轻万钱
戎冠大佩修高容
高名厚实两俱得
声华谁敢轻污隆
总使千秋尚余虑
金蚕玉盃埋丘垄
水银池沼杂鳬雁
可怜长夜鱼灯红
以此胶扰鄙器逯
况复先圣多发蒙
十年有学愿无学
相视而笑畴堪共
先生文章具性道
使我捧读心神融
天授钜手阐元化
轩辕镜子悬青铜
昨日慈仁一握手
罍罍薄日光玲珑
吉人藹藹见真趣
竚令尘土开心胸
世间原自多上士
转忘纓绂分雌雄
长而不宰果何德
从斯永拟参犹龙

莲洋诗钞卷二

卷三

钦定四库全书

莲洋诗钞卷三

蒲州吴雯撰

五律

永乐蚤发

蚤发招贤里凉云解郁蒸
河声过雷首雨气下风陵
凤嘴三春麦龙头五月冰
莲花天外落千仞碧崢嶸

卧佛寺

石壁留苍蘚秋风紺殿陰
殘僧朝闭户山鸟暮窺林
老树饱冰雪白云横古今
津梁本无倦聊示静居心

涉澗

清澗方朝涉人家半薜萝
溪光迎客浅山翠拂衣多
霸业余荒垒盟台俯逝波
谁能瞻紫气函谷等闲过

宿孙家湾

中酒翻成病长謡祇益哀
一灯残夜後百感壮年来
洛水芝难采嵩阳桂未开
愁心与归梦却傍赫连台
读张中丞睢阳遗事叹愤不禁遂书纸尾二首

板蕩中原甚江淮有义旌
一身持衆议百战抗孤城
自合回天地何须计死生
浮图留半箭遗恨贺兰兵
廷议真堪痛精英幸不孤
【当时犹以食人为过幸赖张建封李翰等持议乃定】
只今留庙食差可慰雄图
象服褒申国金吾拜亚夫
犹嫌崇赠恤不到陆家姑
【中丞有姊嫁陆氏虢王巨走临淮姊遮说劝勿行後补缝行问赞中丞军军中号陆家姑先事被害中丞妻赠申国子拜金吾大将军】

赠张西木二首【録一首】

倦鸟愁千里欣逢嘉树陰
晚来望明月清影在高林
散坐仗杯酒凉风吹客襟
苏门追往事遥

听凤鸾音

陪五厓先生宿白茅寺七首【録四首】

盘马入苍翠平桥林影斜白茅何代寺黄叶几人家石井尚生乳寒瓜犹带花晚来添紫气分得赤城霞夜月下凉露空明映石根更教捉坐席还与集南轩洞湿龙归峡风腥虎到门何曾累机事终得畅清言未得山中去看山且住山堦前双树老户外一峰闲客散但孤坐花深方闭关胎禽能警夜一唳竹林间林白四山晓山中难久留王程不相待客路几时休红树引千骑朱旗导八驂转怜猿鹤梦刹那隔阇浮

双老夫妇生日又一首

珠树双栖鹤无忧到岁寒黔娄拙夫婿德耀古衣冠并白人间世鸡豚竈下丹林中行乐处要妊入仙坛

不寐

不寐兼秋雨寒宵更漏重白头愁易得青眼世难逢蛛网山堂药乌啼使院松西风动铃索处处损芙蓉

寄向书友

曾闻向始平能注南华经之子真苗裔江山发性灵寒蛟终谢饵老鹤不梳翎载酒莺花节长吟入洞庭

汴楼喜春三首

蕙风乍披阁柳烟将着扉愁应随腊去喜定逐春归官驿江梅落鷗梁海燕飞玉溪三月路载酒莫相违连日北楼醉人传又立春柳拖新苑水花扫故宫尘鹤醒三更梦鹏抔万里身相拌郢中客同去采江苹生菜细堪嚼玉壶清更陈鸣箏楼上客挟弹柳边人寺塔留残偈宫钿感故尘当年歌舞地几处锁寒筠

有忆二首

忆尔提红烛相寻半玉溪紫钗屋南北红袖润东西咏雪当鸦髻行春过燕泥避风台畔醉裙约落文犀昨夜月明好清光万里同堦闲人少睡阁迴烛无风酒渴三更後心空四照中南来尚乌鹊飞过戟门东

少林早发

初地始一宿劳尘愁未闲钟鸣少林寺日上轘辕关度岭见青鸟沿溪抛白环藤萝犹在眼惆怅欲忘还

送里人归

中条好山色君归春雨时遥看汴河柳尽湿烟中丝饮马崑仑水听莺玄女祠愁心对芳草岂但发相思

留王孟谷游风穴

风穴何年寺传闻水石间云中千树密溪上几僧闲花信宜携酒春心且看山休言涉鱼齿凍雨损朱颜

奉寄吴藺次先生

山榛隰有苓十载念仪型柳恹真才子严光是客星人归黄蘗涧春散白苹汀老向江湖里新诗满洞庭

送宋牧仲先生出使赣州

才子新衔命离筵且泛杯舟过章贡水人在郁孤台桂子经寒结姜花浥雨开春风归雁後肯寄一枝梅送方山先生归里营清义公葬事四首【録一首】

一语即相许倾心谁似君千秋感知已百倍惜离羣拜阙辞青琐还家扫白云好看清义墓秋栢落纷纷

赋得江鸣夜雨悬

一夜短篷雨何人江上眠湿飞云外雁梦醒峡中天便汲中泠水宁须桑苎泉蒙蒙沙岸蕨齐放小儿拳

赋得明月照积雪

尚觉余寒在檐楹雪未消蟾光增皎洁清梦共萧条一相何分别千山惟寂寥沈吟得佳句特许写生绡

送涓来先生归江宁五首【録三首】

夫子久入道即在簪绂间康济愿无尽尘劳思暂闲杯中建业水杖底秣陵山百鸟衔花处从

今日往还句曲茅君隐栖霞江令居千秋尊道德百链悟空虚竟蹑山中屐闲看江上渔等闲
逢大药不必是匡庐【公庐山有草堂】

燕许文章大韦平门阀高乡心违楚水归计且江臯拜

阙辞龙尾承家有凤毛方看庾开府清絕振波涛

赠道者

天半挹红霞沧洲处处家仙经窥玉笥小妓遣莲花渡海长骑鹤开山或种瓜青牛新有约一
夜到流沙

送黄俞邵奔母丧白门三首【録一首】

微禄亲应喜其如时命穷文章千卷拙雨雪一帆东山水悲凉外江花涕泪中伤心衣线断忍
见旧时缝

奉题颢亭先生臯园五首【録四首】

池馆接城陰春风满竹林静看垂钓意未减富阳心雨

过沙田白云归烟树深忘机对邻叟几见讶朝簪邻舍草堂近灌园同一泉白云扶杖客芳草
着书天家在桃花外心当緑水前东屯愁杜老错买灊西田招隐怀佳处幽寻此欲降莺声尝
到午鹤唳必闻双山气通三竺池流导浙江梅花仍作意故故入烟窗仲叔羈栖日山公把酒
时林泉从此识花竹尽堪思野蔓纏青壁山禽下緑枝他时寻石路应得九峰疑

次宿州三首【録一首】

野水围城郭寒涛叠女墙文章通上国姓氏隐他乡夜月千峰雪晨风满剑霜长歌人不识把
酒托清狂

秋夜闻弦索

高斋寂无事孤情良悠然何人理弦索声韵明灯前繁响临风急哀音入指圆曲终心不定空
搅客中眠

赠魏闇之

千里俱为客同看海岳春说诗狂未减惊座醉犹神花信连三月莺声渐四邻秋风吹桂子仍

作夺袍人

怀古四首

东方曼倩

避世依金马浮沈豹尾中借车心自壮割肉气何雄学岂干时富财因取妇空堂堂责董偃真
有大臣风

陶元亮

已分柴桑隐宁甘手板中诗凭甲子纪人是义熙雄浊酒东轩满孤情大化空荆卿托同调高
咏入悲风

李太白

万里峨嵋客长安酒肆中倚才轻妇寺为国爱英雄大药求先得千金散後空只今思笑语犹
似堕江风

苏东坡

邹阳前後世口语一生中忠信通天帝艰虞困鬼雄山前八部近海外万缘空鸛雀蚊虻过都
如电与风

送王乃闲之官平都

读书不为政劳生道亦非远临巴子国喜出华山畿饮礪猿公下衔花吉了飞平都旧仙窟日
可对清晖

白鸚鵡为宋牧仲金宪赋

怪尔生炎海天然素羽稀几惊金粟梦故避雪山飞对月常怜影当花恐浣衣瑶林有仙客数
与伴清晖

忆栖岩寺

最忆栖岩寺招凉有旧亭河流周郡白山势入关青崖断蜂留蜜松高鹤坠翎卢师吾有约许
共一函经

送沈融谷之官来宾

念尔粤西去愁心牵别筵远为蛮县宰谁重帝京篇岭瘴昏榕树江潮上蛤田耽幽閼岩壑莫
让昔人贤

胜水观音院小憩

磴道交初地千山紫翠重晴云消槛竹春雪覆岩松汲涧谷中得寻僧林下逢人家还几里明
月挂南峰

赋得鴈寄鲁少府

一鴈汾阳郭宁知紫塞来花边经斥堠云表见楼台尚有稻梁恋宁防矰缴猜春风知不远归
及岭南梅

别龚明府返河中

六月烦行役贤劳记往还红辞温室树青过蓊门山郡郭仍金犊河流尚玉环劝农容散骑十
里尽潺湲

送六皆还里二首

秋到扰乡梦惊闻君又归迎舟花北笑送客雁南飞甘橘承筐嫩鲈鱼入馔肥无人鉴辛苦莫
下读书帙痛饮无多日相思即岁年江枫红隔岸湖草碧连天自解吟诗句谁能赠酒钱梅花
三竺路愁发早春边阮亭先生得余长沙消息惓然见怀依韵和答

无端衡岳路辛苦近壶头书达三千里人宗第一流江山迷去雁天地许归舟已罢潇湘客言
愁尚欲愁寄石袍朱丈时逢其令子公琢都下辄有结邻之约二首

师表遗东国谁能似彦方传经崇道德持世有文章庭树生兰玉天书下凤凰琴声犹髣髴何
日一登堂公子千人杰相逢共玉京渊源识典则奇气叹纵横柳拂新丰酒花明客帐箏春来
拜床下知有鹿门迎

之津门遂留送陆天涛

去住皆鸿爪淋漓酒满襟东来瞻海气南下忆江陰日暖鱼虾市霜高橘柚林相思各珍重同
保岁寒心送周星公礼部出守南康四首【录二首】

万里敷文命归无翡翠装一麾辞北阙十月下南康问俗匡君侧狂歌五老傍彭湖秋正阔波

浪浩茫茫香炉吾最爱云气似香烟太守能清静高斋对晏眠更邀徐孺子同听谷帘泉好在春明候骑牛西磻边

过大悲院访世高上人

一鸟下苍烟当门海日圆厨香贻笋蕨【时张水部移茗饌往】港白忆蒲莲待索环中趣仍求世外缘拈花方一笑刚在早梅边

绣球

东风真狡狴揆粉傍亭幽银椀盛珠母水绡挽豹驱寒时霜结束暖处玉雕鏤莫作杨花认杨花散不收

送诸五先还骊城三首

东海移家久江南入梦多几惊玄髮改无那壮心何岁晚悲黄鹄春归忆绿萝不须愁往返处处有行窝有道人争识相逢酒一杯精随龙奋迅闲与鹤徘徊万事老皆去百年春又来到家烟水绿几处碧桃开最慕卢敖隐君今入杳冥年华凭野马世事任浮萍海入桑田白山围县郭青王官遗旧谷吾亦结茅亭

送吉咸宁还永乐二首

得失皆何有春风美尔归喜看乡树近梦怯海潮飞白髮休窥镜青山合息机丹台逢玉女应绾六铢衣多爱损真宝长愁妨妙心早知读损益终未去云林之子能同调考盘方独吟玉溪吾最恋重欲事幽寻

送朱汗朱四首【录二首】

同客海门久君行二月中登堂春酒熟入座杂花红射雁宣房北垂纶卫水东却怜书卷内沈困几英雄直道悲难合交情久益真猜嫌堪一笑德素自成邻仓卒无通识低徊见古人临岐翻握手不觉泪沾巾

对月

明月生东海光辉宝镜悬斜窥杨柳外低照藕花边团扇轻相对高楼剩独眠蛟龙避凉夜安稳蚌珠圆

寄杨树滋先生二首【录一首】

玉璫盛仙醴金盤脍锦鳞巾箱藏五岳一笑即千春贞白遥相望希夷近作邻青泥仍几屨旧惠感仁人

集巢云阿二首

倍觉秋光好凉云拂檻生当堦松鼠落遶径竹鸡鸣酒向邻翁乞碁看坐客争莫贪高卧久花下促题名一双青凤凰摇尾下山堂正有梧桐树垂陰十亩长流云晴卷雪飞瀑昼生凉不住岩花落还为扫石床春日过访五先遂呈养五山人二首【録一首】

地僻心逾静城东旧草堂下帘深拜佛扫地自焚香峰势侧当户花枝低亚墙素心人不远谷口更相望

简孟伯人仲人兄弟二首

爱竹真成僻看山岂厌频一朝谐夙愿犹喜得芳邻流水通丹竈秋花接锦茵吾庐冬更好遶屋十分春小圃秋光接从君乞药苗荷香常过院松影迴分桥尔汝诗频寄东西酒屡招梅花三十树珍重雪初消茂远邀看芍药以病不赴宋先生以诗见示时方閱鍾绍京灵飞经帖漫成奉答二首【録一首】

我闻郭芍药好道积精诚女子犹如此劳人太俗生风前怜艳蕊世外想佳名莫被繁华悞金丹术不成

望华山

莲华五千仞灵孕自洪蒙每双风云色能参造化功陰将连太白气自满关中欲问真源在仙人住紫宫

白石寺【寺在鹿谷】

白石山中寺迢嶢紫翠重寻僧常有约无路复何从一水飞为雨双松化作龙几时莲漏下奋迅礼金容

奉酬太宰陈说岩先生二首

悠悠只如此还念旧山期来以莺花候归当雨雪时瑶华感相赠杨柳怅空垂百拜怀春酒仍求壽母辞着述谁能并尊闻有旧堂人争推吏部世久说欧阳诗入午亭古书追丙舍苍戢山六角扇真许耀家乡【公近构午亭较刊全集】

悔人移居奉过一饭遂读其京华集二首

闻道近移居相寻过草庐客中艰一饭君尚具双鱼官舍藤花老【悔人守铨最久】秋窻枣叶疎春明馆新绶瑞雉始迎车

爱尔京华集逡巡又几年惯书乞米帖滥用买山钱拜命思岩邑移封畏酒泉寻常发乡梦东浦已春烟陈陟斋给谏丛兰双枝合蘂绘图索赋

圣代稀封事看分堦下泉低时如带雨密处似含烟莫讶三珠树休惊九品莲连枝仍共萼竞爽谢庭前

潭州遇李杞瞻前辈

夫子罢官久高怀人不知相逢湘水上同过落花时世事只如此天涯何所之犹能藏斗酒醉读屈原辞韩中丞署中喜晤罗宏载北旋赋别三首

十日巴陵道三春官阁中干戈残堞在琴酒故人同梦失梅千树愁看蕙一丛登台犹有赋飘泊为谁雄入洛已非计浮湘宁所亲江花工笑客楚女善留人久识诗无敌新看画有神祝融千仞色落笔羡嶙峋【宏载纳姬近益作画】

听雨围红烛将离更踏歌转怜轻去就还嘱慎风波白髮交情重黄金意气多天涯知己在贫贱竟如何春初同旦复元彦笨山叔敏过退居老人

却忆江南路裙腰草色斜篷遮三月雨舟载半塘花浪迹犹如梦浮生更去家低回三十载随处惜年华

咏紫荆限韵

偃仰对南荣春风动紫荆暗香时堕水疎叶不巢莺转以林塘晚因欢兄弟情天涯尚岐路把酒惜长征

一亩居同幔亭饮酒二首【录一首】

王谢盛门閼琅琊近亦稀举世重纓冕先生仍布衣看花宿酒肆骑驴来王畿独有旧山思春风怀采薇

呈莫襄藟先生二首【录一首】

先生本人瑞九十尚传经着述尊尧典功名薄汉庭关门虚紫气草阁带寒星别有堪娱处曾孙绕幔亭徐电发卖昇元帖遂成三诗兼论书法大略云

爱尔昇元帖风流七百年长饥不自宝却换水衡钱太息鵷羣笔摩挲幼妇篇白藤书笈在零落夜灯前闻道山陰字簪花格再祧【右军初学茂漪继宗元常】却观戎路表师法信鍾繇瘦硬神方见渊源????自昭从君辨端委惆悵惜南朝【太傅书他本皆痴肥此独清劲杨用修谓南唐絶品在淳化祖帖之上因可想见逸少师承】狄道悲公主平原念病妻穠华当日就鹿脯几时题拙尚存钟鼎工翻浣土泥何人标野鵷愁杀庾征西【鍾王本存古法学者日就熟滑宜为盘马武人所弹射】

己未元日同豹人大可舟次锡鬯其年子静集峩帽舍人斋拈青咸韵

先酌年谁少神交眼倍青吹箫过草阁【大可度曲其年吹紫箫倚曲和之】饮酒似旗亭红烛围名士青氍卧客星【时锡鬯即会宿子静处】盘飧真可贵不是五侯鯖

耳热脱朝衫神驹苦轡衔野人犹任达踪迹尚尘凡锦带红酥手黄精白柄鑱几时携少妇采药伏波岩

饮巢云阿君子亭

独把一杯酒酣觴君子亭假山擘华岳剩水割沧溟鸟路回虚岸鱼牀拍浅汀高吟清兴足却惹紫虬听

客赵好兰若

秋爽轩牕静闲僧伴竹扉犬行黄叶响人语乱鸦飞玉露抛红药勾栏坐道衣萋萋芳草暮惆悵未言归

小雀

嘲晰深丛里逢陰聚衆鸣滥谋鸚鵡粒不解凤凰声殿瓦春巢稳?堂晚浴轻秋风将化蛤尔尚乐浮生

客次忽忆同友雨中游条南万竹园

滑路饶佳兴披蓑问野垧洞云依峭壁山雨聚孤亭尝稻炊红叶调鱼动紫萍所怜一分手南北似晨星

沂州道中寒甚

初识临沂路水痕啮草桥青馱荒旧寺黄竹苦新謡晚税输山茧村盘荐落椒频能异风土终是惜飘摇

长城铺

闻鸡已就道岱影尚模糊山拥秦城险风吹汉月孤谿深窺豹鼠洞冷叫鹈鹕行路何时已迢
遥怅远途

自涟水再入都

密雪沾春路柔风暖大堤云垂山柳暗日上野莺啼愁绪萦吴茧长才愧鲁鸡帝京空往返词
赋几曾题

春望

漠漠中原色青青陌上林王孙空有恨芳草本无心花放东风暖桥平野涨深迟行不自厌徙
倚听鸣禽

饮万竹园二首【录一首】

曲路入山烟春风二月天栢根回抱石竹叶暗通泉高唱随林鸟轻身看纸鸢摘星应未远杯
酒续青莲

过渭南

渭川新雨後晴照复娟娟潮落滩声小霜明树影圆陇云随薄日楚鴈入高天秋岸骑驴客西
风自黯然

宿慧果寺

万感清秋夜愁闻玉漏长无端如中酒不尽为思乡灯暗秋虫入风酸桂叶香长歌杂短咏若
个解行藏

过友人村居二首【录一首】

地接王官谷常怀表圣风林塘能比迹琴酒况相同点笔湖光白捶琴海照红卜居吾有意声
气石林东

过黄处士斋

初识墙东路乘春踏细泥梅花香雨早兰叶惠风低鸡埭仙翁置茶经处士题天涯如此日莫
怨草萋萋

晋祠

悬瓮山前路清秋见早鸿一沟瓜蔓水十里稻花风杨柳差池绿汀蓝远近红三年两来往生计太匆匆

晋祠别陈子文三首【录二首】

一水清如此沙边坐不辞濯缨今最得驱马欲何之渚冷鱼龙蛰山空鹳鹤悲徘徊双栢底同惜万年枝赞府才真好题笺更不羣他时陇头水还望海东云大道无多说微言惜强分相怜转相勉莫只绚声闻

送西木之井陘二首【录一首】

连日东楼醉东看海气昏花枝当笑靥竹影覆球门风急交芦寺天高下鴈村晴波千万叠新报减潮痕

寄里人

旅鬓萧骚甚低徊东海滨到秋翻作客渐老只依人天迴移朱鸟风凉散白苹涧南红树好愁絶忆垂纶

清极观【在中条】

灵祠四山口积翠俯重陰独立神境寂微风生北林秋篁全迸节老树半空心乱水当门过泉源不可寻

次小河司二首【录一首】

潭府愁卑湿迢遥接远烟空迟渔父棹已过洛阳年湖草留春日江花入暮天却疑客路稳横海入戈船

赋谢寇伟人

街北提壶夜更阑上马时红粧知送客白练少留诗鸡乳过春草莺啼入夏枝玉鈎山下路还肯寄乌丝

健松别业为方渭仁赋三首【录二首】

织女祠边宅桐君山下村风流前代没堂构至今存鷺鸕荒洲岛诗书到子孙低徊松桧影依

旧覆柴门沧海横流日丈人方纬萧江山行药遍岁月着书消志就癸辛里诗留丁卯桥百年感风木愁溢圣湖潮

留别阮亭先生六首【录四首】

得失本一致陶然返旧林易归贫士策难遣故人心绿树方垂?黄鹂正好音囊衣太轻薄不会作黄金守拙存吾道先生奈我何愁从归日减泪向别时多知己期簪绂闲人爱薜萝莲花千仞色矫矫落晴波深隐岂非计贱贫难久居也知无旧业且复爱吾庐闻道甘悬磬无才敢着书嵩阳招玉女渺渺又愁余【时雯归将又之中州】

出处迥非我徘徊空念羣可怜抚今日游子如浮云雨露黯芳草风花连夕曛那堪江水上重覓谢将军留别李紫澜并遥致方山及冯徐二君子三首

去去复何求杨花吹驿楼开樽怜共酌秉烛忆同游高阙看仪凤闲沙认野鸥生平感风义多半在陵州夫子古情性洒然冰雪姿退朝常命酒乘月数围棋冯子宁弹铗【方寅】徐陵雅善诗【电发】一朝歧路侧那得不凄其青嶂关南路黄河渡口村柳边辞贵客花下闭柴门矗矗山松直翩翩水鹤翻读书增道力应念故人言

途次六首【录四首】

一载金门客三春玉塞情倦吟豪士赋愁听酒人箏入谷鷺无伴还家鴈有程伤心芳草色仍傍旧年生岂为苍生出深邀

圣主知故人携斗酒歧路感将离紫阁松千树青门柳一枝南山就别业强饭右丞诗

珍重棠村意风流近亦奇每联名士饮不似尚书期繾綣青山路将贻白苧词徐陵吾好友先受下堂知饘粥真无计难堪金石歌贫伤学道晚痛悔着书多妻子羞禽向功名贱伏波只愁种处士无奈北堂何

感兴

一载长安客还家竟若何千金奉母少一饭识人多夏草闻鶗鴂春沙梦骆驼九峯安稳在学种玉山禾

怀昉思

洪子谋生拙移家古蓟州身支西阁夜心隐北堂忧卑已延三益狂言骂五侯林风怜道韞安稳事黔娄

怀豹人

淮海羈栖客秦川游侠身拜官辞

阙晚失业到家贫婚嫁愁中妇诗篇累故人弹箏纤手在端待脍江鳞

临发阮翁招饮醉後狂言书以谢过四首

斗酒街西宅离怀仗緑樽高情容醉客微笑听狂言人物难评隲文章最讨论从来姜桂性未易附寒暄处士名堪痛文人趣亦卑何曾惊宠辱先取不磷淄有道通千古无言备四时春风花叶弱莫取最残枝

隔树见凉月高斋罢剪灯功名身总误贫贱语无凭似驚人犹贵如弦世所憎可怜今夕外跋扈更谁能大小名何据成亏计总非緘滕庄叟喻机警谢娘围无事归平等忘言合上机翛然送日月闲看两丸飞

峪口

木叶飒清秋山泉抱石楼衔芝双白鹿拍浪一沙鸥露坠瓜花弱云生松磴幽沿回寻岭路应见大龙湫

山中二首【録一首】

积雨生秋晦飞泉出半山归鸿渡岭急落叶对人闲竹屿随高下僧楼借往还孤情何所得终日有潺湲

宿僧楼喜汾郡丞刘与襄先生至

偃仰空林寂寒花照酒杯悠然游子意欣道使君来素念托清颍相逢继啸台廿年悲喜集难遣魏城隈

赠历城王秋史二首【録一首】

爱尔文千卷依然行路难将军能好客才子慎加餐溟海渔竿冷崆峒剑气寒已成盐铁论蚤晚召桓寛

王官谷

朱楼覆残雪花落无冬春衆水急争壑一峰闲对人白云识心素空谷留皇醇晚来鸥鹭侣接

翅桃源滨

赠周麟声明府【安邑令为陈子文堂翁】

夫子真清惠深仁入颂讴文章仍照耀诗句见风流谷水通车辋山光媚玉鉤颠軫饶峻坂莫使困骅骝

赠章素文

金马浮沈久燕台会好初名高终不荐天意且何如布袖难为客松牕悔上书

圣朝多雨露早晚及樵渔

赠许紫峯

散发西岩醉人间许远游宰官推道业狎客爱风流日月消棋局乾坤任鹿裘相逢先一笑吾道本沧洲

小集晴云书屋二首

爱尔读书处晴云遶舍斜回风犹堕雨映日尚成霞碧?一庭竹红垂满径花遥天有孤鹤掠影过圆沙

为趣凉风至陶然共绿樽座移花近眼迳转屐留痕醉凭乌皮几闲吟秋树根归来凤城曲山月涌金盆

题张辅公别驾浣烟楼二首

信道楼居好频来说息机绿杨掠波起白鸟破烟飞胜日坐忘曙弹箏听不归旧山抛岁月闲煞钓鱼矶泽畔愁为客招携兴转多牕移烟际舫岸对雨中蓑花笑三更笛灯明子夜歌白鱼何处买刚道网船过寄张观察时将由中州还里二首【录一首】

悠悠踏晓霜三日过渔阳问路水村远怀人冬夜长旌麾雄远徼书剑愧山堂风雪邯鄲道骑驴入大梁送汪郡丞之官渭州公子文升侍往二首

受命轻千里承恩出禁闱辞燕箏罢鼓度陇骑如飞幕府红盐近军容黑水围天寒频讲武大雪满弓衣公子才无敌诗名世久传严装书自裹絶徼檄频宣花压蜻蜓帽烽销驷裹鞭往来关陕北须到草堂前

赞叹寺【寺在万固峪後产黄精有潭澄洁在门外】

赞叹何年寺千峯拥石龕竹梢侵讲席花蘂落经函紫蕨烹来嫩黄精晒後甘下方昨夜雨云气满龙潭

大悲院礼懺

波光无点尘一舫是通津遥辨风幡影同参初地人天花晴更落枯木老能春懺罪安心後都捐妄与真

欸乃书屋为笨山作

舍人读书处近傍漕河滨岂效临渊客常逢晒网人冰开鱼弄藻花落鸟衔春愧我风尘久淹留爱白苹

留别张振宣二首

尚忆西园醉徜徉坐竹林门前流水静堦下落花深岁月惊弹指天涯惜滞淫碧桃归路好回首发清吟别去翻相忆何时方是闲人同嵇阮侣交在纪羣间酿借崑仑水牕涵湖县山读书契悬解应获驻朱颜说岩先生过访一亩山居话旧四首【录二首】

时序惊弹指吾生只腐儒何知食鴈美争笑住山愚寂寂松间阁萧萧水上庐斜阳讶驹馭深巷问潜夫敢谓无书读劳生肺病余引年问参术劝学废虫鱼缅邈郎君谷迂延水部居春明待归去或可带经锄

送西溟南归四首【录二首】

世态悠悠甚君犹古性情风前频酌酒花里再吹笙入道即无事忘机何所争试看希有鸟原出紫霄行渐觉闲名谢交游喜日疎为君置杯酒不醉复何如驿路谁知已名山好着书相寻监湖曲为我饌鲈鱼

送徐健庵先生南归四首【录二首】

汉代师儒重端闻道业尊为怀先壠切特拜

九重恩悱恻邀

天语殷勤识里门白头忠孝在至性老弥敦

晋国午桥日温公洛社年慙闻归緑野终不废丹铅黄阁情犹待苍生望总悬蒲轮看即入难
恋碧山烟韩维藩兄招游盘底山园时华林姜公暨迴凡鳧庵佩青鼎臣诸君子同集用杜韵
四首【録二首】

九十春仍在百花争一泉山光青似髻云气白於绵酒借

仙人酿食供宰相钱登临无不可掌上看秦川【维藩为少师公孙辈】老树何年种名花此
日开忘机仙苑草如梦藥宫梅雨怪潭蛟舞风知海鹤来苍茫凭断石恋恋古莓苔

宿湖口

斑竹晚沈沈维舟惜滯淫潮来全楚白云上半江陰远渚乌双下空山猿一吟故乡千万里今
夜洞庭心

送王仲昭归钱塘三首

一夜黄梅雨南风催别樽江边移桂楫湖上掩柴门酒力贫犹壮诗名老更尊平津旧宾客零
落不堪论孤山傍水涯水次见梅花鹤长仙翁宅人知处士家有书留梵乘无梦到京华倚仗
双松底前山多夕霞同奏长杨赋清时叹未逢罢归三殿直重继五湖踪买帖花边市寻僧竹
外峯何年问笈注特访郑司农

送景文岩二首

何用诗名大【新城每向人辄谬云吴子诗名甚大心感知已之言】艰难老病余且看三日
雪省问五车书君复雪中去谁堪慰索居春风倘南下同饌浙江鱼

蚤岁过吴会苏州又秀州惊心三十载发兴欲重游老爱鸳鸯水贫贪粳稻秋文翁新政好凭
语寄东流【谓佟青士使君】

送董禹扬时携内往故有末句

爱尔江花阁新文锦不如久传繁露学方奏治安书且共一尊酒还迟双鲤鱼前山如黛色都
拥七香车

饮孟氏园二首【録一首】

衆峯在林表宛然宾主同竹间流水过花外石阑通客语鸟声寂云开山迳空名园兼胜侣十
倍说墙东

答友四首【録三首】

朋好日以远村墟甘隐沦山中拾橡客河上纬萧人之子能相访盘飧媿未陈更闻欲携手仍共结芳隣昨日劳书札琼瑶纷见贻出入在怀袖尚有虬龙姿我欲急裁答迟回无令辞折梅风雪里聊以寄相思却忆陪游日联镳涧水阳云中见鸡犬世外有畊桑带雪谿藤古经冬水荇长晚来酣白酒即此是陶唐

怀俨若

念尔佳公子将为万里行艰难终意气清白益诗名衣着桃榔雨舟看海峤晴乡书何处达无雁共南征

送韩维藩入都二首【録一首】

东风难遽别车马若为攀宁恋莺花节终还鹄鹭班红倾蒲阪酒青入蓟门山但看贤豪客从来几个闲

越女

憔悴浦中莲低声问远天裁衣抛白紵渍泪掩红绵蜥蜴盘深字真珠寄短篇年年花事近空立苧萝烟

送友

春风旧山好君行偏此时尊前言未尽林外马长嘶芳草关门道垂杨令尹祠江南梅正发莫惜寄南枝

東乡宁大令张公

为政万山里艰虞况七年百家租赋苦千仞讼庭悬世德传司马风流俨昔贤题诗兼种竹日日石堂偏

云中寺

天半云中寺四山皆白云我来云际宿却忆云中君塔影当晴出涛声入夜闻此中有猿鹤莫勒北山文

宿杨司空园

看竹宿竹里主人都不知蜻蜓上帘幕
飞轩墀荷叶尚欹岸寒花方着枝
钟声催酒醒灯火四更时

文选楼

弹指萧梁代伤心文选楼
秋衾泣铜辇春殿狎江鸥
朱雀围何急青丝恨不休
由来膺玉历未可仗金瓯

天柱峰

空谷良非远招携亦自豪
转忘千径曲见一峯高峻欲卑三诏
【峰下有三诏亭】尊将俯六
鳌崇岩真可仰一为荐溪毛

东瀑布

东岭郁葱茏逶迤下玉龙
香岩通一线云窟簇诸峯
石髓飞逾冽天浆挹更浓
扪萝发长啸初日看高春

西瀑布

坐卧西岩下层水落绛崖
三春常梦雨十月忽闻雷
到眼云光近当头鴈语哀
何须浣冰雪姑射有灵胎

拜司空遗像

缅邈先型远皈依旧德尊
冻禽窥石阁野鹿到柴门
赤舄风何古黄绂诏尚存
【像着赤舄有童子捧诏侍侧】
後凋见松柏千载着灵根
【公祠前有柏生石上】

次静海

县郭依春水牵船过夕阳
行行芳草路不断梨花香
云气湿垂雨风声柔剪桑
低徊双燕子有梦入雕梁

题溪馆

春鸟鸣复飞春烟满翠微
人家临曲水斋阁住清晖
樵客晚相语渔人行未归
溪山诚可乐方制水田衣

次清化即景

白鹭明秋水凉风吹葛巾溪边收稻客柳下织帘人野馔芋魁熟风楼蚱蜢亲十年来往路重
问浊漳滨

张兵马招踏青

春雪融沙岸庭梅晓笛中有情堤草绿无意海云红酒榼乡人语帆樯异国风罗浮花信早天
际几归鸿

广陵留别孙无言

黄山归何日猿鸟皆望君我向中条去花岩弄白云浦沙晴照舫江树晓含曛握手不堪别悠
悠鸾鹤羣

途次怀归华山覓诸隐居

未遂金庭隐尝怀石户农几时结茅屋日坐青芙蓉梦歇关门雨心空岳寺钟白云最相识来
往宿檐松

还中条别监文师

屡过斋厨饭犹分般若经有机酬钝滞无诤乐沈冥潮梦关门白山迎驿路青重来应一笑大
海总浮萍饮丁荷峰参军署斋时同元彦笨山芟梁部山诸子

有道且薄宦悠然沧海情宾筵交雨气官舍傍涛声天上佳公子江东老步兵登楼仍半醉诗
思各纵横

寄友

荏苒三年别相思岂世情寻僧同雨出载酒并船行河上青苹老林间白露生莲花五千仞待
尔蹑峥嵘

初闻蝉

作客知秋早何须尔更鸣从今多见鴈此後少闻莺两?如三叠千林共一声乡关那堪忆回首
绿杨平

冠阳雨後

川原气候变清秋草木长骤雨生沟水溪田何茫茫浓云湿西岭轻泥沾条桑坐息迟同客长

堤榉柳香

八月

八月苦逆旅白露青棠生乡国渺何处西风空复情断鸿凄塞影落叶下寒声城上羽林骑纷纷晓角鸣

怀翁山时方归省暂携家白下

江关成失路愁对江花繁数欲返京口思君在白门可回莱子棹几遇信陵恩咫尺不能达临风无片言

题楞伽出塞图

出关塞草白立马心独伤秋风吹雁影天际正茫茫岂念衣裳薄还惊髣髴苍金闺千里月中夜拂流黄

送玉如之蜀四首【録一首】

之子劳行役迢遥古益州城高通白帝峡急避黄牛茶向蒙山采鱼从丙穴求西风岂摇落清絶荔枝楼

东郭即事

云上晓山翠平芜野望悬鸟啼藏竹寺鹿饮杂花泉题字经楼侧烧铛锦石边谁家作寒食林外有风鸢

晚集玉础傍城小园

小径依城角羊求路渐迷花闻谯鼓暗竹傍女墙低夜雨人三个秋风菜一畦开门仍貰酒莫惜踏深泥

走笔讯杜又振

上国相逢日春风蕙草香不知故园竹今复几竿长雪尽娥皇庙鸢飞郑谷庄闲时拟相过细话酒垆傍

初辞家行中条山下

戚戚正寒月胡为今远行悲风千树肃残雪几峰晴已觉怀兄弟初知念友生惟余天外雁似我作南征

丹阳晚泊

日落长流静停舟望毘陵天寒闻戍鼓风定识渔灯故国渺千里烟波应万层愁心似江水日与晚潮增

再逢王阮亭先生於江浦

悠悠近十年飘泊随风烟每与世人忤益思夫子贤相逢江浦上叹息夕阳边何日成归计春山有薄田

再赠吉协和四首

经年如久别千里喜君来有约仍联榻无心更筑台青灯同不寐白髮两相催为问东山上桃花几树开念我如饥渴逢君问急难千秋心如许半夜影相看莫击荆卿筑终弹贡禹冠绋袍无可赠嗟尔敝裘寒相逢意不尽相送复如何匹马龟蒙道千山雨雪多闻鸡余起舞扣角尔行歌明岁薰风夜重来醉薜萝又作天涯别那无十日欢平千从此去易水为君寒病觉世情薄老知交道难今朝斗酒意来夕梦中看

读傅公他诗感书其後

苦节孤生竹哀弦寡女诗感君迸泪处是我断肠时不死翻成恨多愁只益悲长饥忍薇蕨高义北堂知

平水感怀

高柳下鸣禽春城二月陰新莺听处滑芳草望中深花雨忧时泪山云出世心不知烟海上谁会作黄金

石门三首

盘回溪路长低草见牛羊风急山藤折崖崩石髓香鷗鷄舞难定孺子歌未央斟酌松云里寒花近石牀拂袖动云根涛声过石门野花红覆路高柳碧连村鸟道盘危栈蚁丘倒客樽茱萸莫漫插终是惜黄昏犬吠夜如豹风光小辍川林回烟续断月上水沦涟蟋蟀秋仍语鷓鴣冷未眠不须愁辗转渐看晓珠圆

虞乡二首【録一首】

洗马村南路王官紫翠重人家依谷口樵径入高峰竹暗千竿雨泉飞万壑风司空亭榭在临望思无穷

送张无竞还河中婚

并辔宜阳道欣闻君又还桥仍清潁水花尚陆浑山园客收蚕箔仙人赠指环吹箫长夏日唐韵出人间

谒永乐宫二首

久说双珠树今来永乐宫云霞生户牖日月近帘栊扶木千年宅崑仑万里风刀圭如可覓丹火夕阳红仙翁果何处松桧但依然剑气常通峡鹤声每在天罍罍丹凤攫橐龠白龙纏晚爰西峰月清光溜石泉

倚檻

倚檻白云外推窗红树边年华犹浩荡风景几秋千海雾随风濶江沙裹浪圆鸣鸠苦相唤惆怅负春田

汾阳馆

残雪明高岭春沙引乱流柳遮郭外驿花映水边楼风土乖乡语年华系客愁桑田谁负畚惆怅听鸣鸠

莲洋诗钞卷三

卷四

钦定四库全书

莲洋诗钞卷四

蒲州吴雯撰

七律

霁公次壁刻金释重公韵索和即荅

年华忽忽髭丝秋下泽常思马少游高咏喜闻清似鹤好山惊见翠如虬名心难遣千年妄世事谁为第一流今日追陪龙象後髻珠可许付裴休

魏惟度留饮即赠

汴柳当门映索居名山心事近何如琴樽尚自能留客风雨何曾厌着书不少涂泥悲騷裹并无钟鼓溷爰居蚊虻鸛雀须臾过那用临渊羡大鱼

寄黄经公

曾拌官舍醉如泥别後柴门掩玉溪树下茅容原有母闲居潘岳已无妻当年情事悲鸿爪近日文章爱马蹄弹指韶光惊过眼几时灵药就刀圭

苇亭即事

芦叶一丛还两丛後园散坐见飞鸿塔泥着草昨宵雨檐网惹花今日风便可弹碁开白袷那教踏箭趁黄骢女墙王屋晴逾好都付狂歌痛饮中

陪金宪伯登九山寺同姚绥仲孝廉二首

百折崙磴道长天风万里浩茫茫已攀絶顶九青髻回见一泉千绿杨雨自僧厨归石井花从樵路散寒香周遭碧玉屏风叠谁把匡庐借太行

矗矗松门傍日开山前车马漫徘徊洞中谁贮千秋雪杖底争喧万壑雷磴道犹传龙女过珠幢方见鴈王来三生合受金人偈忍别繙经百尺台

相州初寒

昨日北风寒有信今朝东阁梦无端衣裳在客寧辞薄岁月因愁转见难才子恐教传邺下名
倡争说盛邯郸萧萧荻苇三台没愿乞仙人药一丸

宿少林寺

宝阁崔嵬明海霞香林四月娑罗花子规啼时山雾暝怖鸽飞处松枝斜梦本非真尚颠倒心
不可得何正邪若解大千同掌果便应常住法王家

送杨南城出守劔州

安陵消息近如何拜得新恩慷慨多远水远山通洱海春风春雨下牂牁三更鹅鸭裴中立万
里旌旗马伏波岂但长卿能谕蜀天威先靖夜郎戈

别陈顥士

一载追陪笑语同可怜岐路洛城东伤心涧水兼瀟水落日南宫更北宫气谊暂教违贡禹文
章遥望荐扬雄何年金谷园中醉重对荷花一顷风

别潘殿升

入望中条决计还君亦将去龙眠山文章谁信已无价世事何年方得闲酌酒南宫北宫外分
手朱雀苍龙间相思各忆天津水五月浮桥下白鹇

读东坡种菜诗因成一首

颇有城隅傍井田瓜花楝实每清妍不烦更借参军地便已能当宰相钱早韭剪来新雨後晚
菘羹向早霜前兼闻此味须常有休论东坡仕宦年

九日同诸公登高

芦荻萧萧木叶摧他乡犹得此登台旧山愁絶二千里客席端应三百杯丛菊有情人醉後高
天无际鴈飞来樽前多少金门客尽是西京作赋才

初春风雪过赵天笃

两日东风寒较甚今朝飞雪渐交加湖边新柳正揆线山畔残梅犹弄花鸟语听来无次第草
痕望去已横斜几年梦想特相问骑马过溪冰坠沙

题姚玉阶西湖感旧诗後

六桥烟柳拂衣尘苏小坟前芳草新宝马香车空有约风裳水佩总无因神伤偏在湖边路情
鍾方为我辈人更有谁来作寒食梨花如雪认前身

仲春三日雪和愚山先生韵

入望空明杂晓晖随风故故扑帘扉塔前柳絮争相掠岭上梅花信久违塞马沾蹄连夜猎春
鸿留爪隔年归鸕鷀莫便遂沽酒又早重穿貂鼠衣

貽洪昉思

不耐悠悠世上名薜萝深处有谁争能通彼我闲千古才着成亏恨一生广汉何妨贫折象壶
山窃愿隐樊英年来真见忘机好非借云林寄不平

再示昉思

世事从来少定形须弥未可熟飞萤黻音有辨复无辨鲲化南溟更北溟欲杀何尝非李白闻
歌谁更识秦青豕零鸡壅当时药暴贵新传又茯苓

赠朱悔人学畊东浦

双鸠呼雨又呼晴东浦何人正饷畊蟹舍遥连平楚白柴门俯见下江清烧畚侵晓驱牛出饮
社连朝荷锸行莫讶逃名名转盛耒边终有汉书声

逢王子重吏部京师即回秣陵省覲

藤花官舍日从容相忆长吟对礪松七载谁怜花下别三春还喜寺前逢新诗远带峨嵋雪【
子重有使蜀诗最奇】归棹方迎白下鍾为拜山公道珍重献花岩北待相从

沈洪生编修宅集诸子看芍药四首

灵根曾说托丰台新买千枝傍座开杨氏诸姨同辈出赵家姊妹两宫来东西客到四千里贤
圣酒倾三百杯为恋高情忘卜夜四更灯火不知回

旖旎争看叠画屏灵妃髣髴下云輶怜时那便分桓李妒处何从较尹邢名酒远将阿母醢盘
飧羞荐五侯鯖浮生此乐真何极莫遣当筵锦瑟停

肩拍洪厓笑语同长吟促坐凤城东酒当璧月清凉夜人在瑶台锦绣中画檻缘堦香有露珠
帘到地静无风欲归更覓银缸照爱煞深红杂浅红

欲去还留遶曲廊酒人被酒更清狂舞当芳树惊乌鹊歌倚洞箫来凤凰花气蒙蒙寧惹雾炉烟袅袅尚焚香莫愁那得频相接只许卢家有画堂

六皆兄招诸子集螭庵侍御宅

凤炬辉辉照画堂秋深终是感他乡琴樽尚恋严公宅畚鍤谁操谷口庄岂为上书留北阙犹思取妇溷东方愁来鲁酒都无用坐听西风鴈一行

送曾青藜之粤东二首【录一首】

天边才识少微星欲别还携双玉瓶东阁连朝方罢酒南人从此更传经春回黎母花前艷雨过金鳌海外青珍重家人问消息平安先报锦帆泾

呈少宰李容斋先生

次第朱门影寂寥霜天感激更相招盘飧谁暇谋寒士启事公犹重

圣朝橘树当奴供玉案雪花如掌避金貂座中不少知恩客一饭从来未易消

赠黄六吉

十年令望叹无双亲见风流意益降的有公才比东汉更开诗派振西江青春索句王孙草迟日摊书玉女窗最感天涯知己在莫辞沈醉续兰缸

赠武建侯

海风吹雨又吹晴渐次桐花接坐生醉後倚阑看点笔狂来别院试弹箏沧洲意气朝云上鄂杜声华昼锦行好在鸭头潮水绿不须酒渴忆江清

斐然纳姬

清秋谁和杜秋诗寂寞樊川恼髭丝刚遇桂轮生魄日恰逢桃叶渡江时漫言春到花盈树还看阴成子满枝佳事合题三妇艳中堂乐任主人为

顾梁汾舍人自制竹罏携至都下客争赋之余亦为诗二首兼道别意用原韵【录一首】

竹炉活火夜犹然梦绕吴淞水石边塞上风尘逢旧制江南榆柳忆新烟山移明月空猿鹤洞改桃花几岁年认取庐山真面目天涯随处谷帘泉

和荅汉仪旭庵升也雪後游万因寺之作【有序盖闻右丞高寄曾开鹿苑之基江令修心亦憇龙华之馆是以通人旷士每托兴於林丘羈客劳人宜游心於禅悦况乎峰连仙掌水映河图刹留龙象之居碣表隋唐之字山条水叶忽迎宝马之来云寝风栖暂息名贤之驾结胜因於世外播佳句於人间侧仰风徽弥增欢喜晴沙拥路怅未聯金地之游霁雪当轩但遥?玉山之照勉成四韵用附千秋云尔】

日上高林彻曙钟看山结骑得从容春泉乍动花边屋残雪新消竹外峰苔径通时羣鸟散石门开处一僧逢幽寻最有柴桑癖白社今朝怅未从

登楼次木屐韵即简甜雪二首【录一首】

灏气常思契混茫眼前原不异洪荒坐来虚室能生白养就金鹅渐褪黄百折世情坚道力几回心事尽名場凭阑究取云生处瓔珞街前认旧乡

次韵荅韩文尚

亦不辞名不近名偶然相见即相倾休论金马浮沈事且对玉壶春酒清大药终思还旧我名山岂敢负新盟论文连日花前醉只觉人间尚有情

赠刘西谷侍御二首

当年同醉荷花酒今日来过杨柳津奉使已为驄马客论诗仍是玉堂人文章海内原无敌道素河干久作邻更向治平求第一维扬政绩两嶙峋【令弟自翰林出守扬州】久向山中怨索居半鸡何度更无余春来嬉戲思文褓花下追随愧板輿织素织缣机总废桃根桃叶事全虚吴娃应践当年诺待与康成理架书

津门喜逢徐师鲁即送之山东【健翁子】

海畔相逢笑语温惓怀今昔道终存看花乍可称新契对酒仍教说旧恩事业此时归凤沼文章千载溯龙门匆匆又作河梁别日观峰前役梦魂

再貽子载

爱尔英姿不世情矫然龙性掣长鲸阴符帐里再三读宝劒匣中犹一鸣学得飞仙能控鹤携来中妇善调筝何年已就还山约同向金莲顶上行

送友人滇南省亲

万里腾骞意气雄乌衣门阀重江东兰桡正美乘风便春殿犹传奏赋工青草湖光迎彩笔点

苍山色扑黄骢茭荷香里趋庭早会看西南海照红

将发潭州阻风

江风三日且不息愁倚江阁衣裳单日暮鱼龙争出没云垂水石生空寒欲去尚恋贾傅并到家还近毛女坛若问湖南好风景栖岩红树九秋看

赠张太守愚谷二首【录一首】

长夏高斋拥赐书南风吹过北窗虚刚肠百链能容物英论千回倍起余郭外莲塘藏白鹭阶前酒瓮掷金鱼几回话到郎君谷修竹南头好结庐

蓼花

嫋嫋秋光映野姿依依疎干对寒漪方看数缕花开处渐近长空雁过时风动白苹偏弄影雨交红树半垂枝浦中荷叶还如镜相伴前汀晚更宜

戊寅初春简张厚卿广文【厚卿畜妾甚多长治人】

春云阴阴将作雪重慰新年望岁心将有莺声变寒谷岂辞腊酒对高林牙籤暖傍珊瑚架花胜娇分玳瑁簪更喜日长无一事课书香阁写来禽

题孟伯人小照【碧山堂乃伯人园中堂名也】

碧山山色正氤氲山下高松更不羣几次山堂常载酒每於松径数逢君栖岩寺里僧同话郑谷庄前鹤共闻尤美文章可华国白云他日到青云

吴门初春

闻道江干冰渐消眼看芳草坐无聊酒杯纵使愁中得春色终难客里消山鸟漫吟泥滑滑吴娘偏唱雨潇潇归时借问金陵路桃叶新添几尺潮

闻喜雨後简枫仲

雨後残阳高树间豆花覆井桔槔闲凉风徐度溪边寺宿雾才收郭外山每惜劳生仍远道难将大药驻衰顔相逢且撒河汾席塔院东头看白鹇

水村

林叶萧萧欲暮天人家烟火夕阳边寒瓜引蔓垂茅屋野水生波入稻田渔网悬来晴树外钓
车牵过晚洲前圆沙鸥鹭忘机甚队队菰蒲自在眠

赠孙都阍

瘴雨蛮烟海峤清雄才从事伏波营珣戈晓指春星淡猎马宵还腊雪明北阙千秋方铸鼎南
天万里已消兵霜华点鬓休相讶二十年来大将名

水村

万树垂杨绿不齐人家住在涧东西新篁迸玉方连屋嫩苻如钱乍点溪野墅客还忘闭户晴
沙屐过不沾泥风光都似招贤里只少红翎水鹤啼

重过故关

关门芳草寺门钟石磴盘桓感旧踪白日回看天路远青山喜似故人逢楼台傍晚晓开岩户雷
雨凌晨过涧松为爱纷纷红蕊乱翠禽衔下碧芙蓉

闲居示内

十年宦学两无成且共山南事耦耕可向田间随冀缺几曾床下拜樊英提筐蚕月劳机杼采
药鹿门忘姓名若使蓬山同有籍玉箫双引凤凰声

村居

莫向村居厌寂寥绿杨千树遶兰皋河声卧听崑仑远岳色晴瞻太华高岸上桃花如绶带溪
边芳草似青袍晚来犹好垂竿在一线清风引六鳌

题岭祠

半岭闲云祠树多野人心事近如何黄龙酿雨飞岩窟白鹿衔花过薜萝石上方抄云子饭溪
边谁和紫芝歌年来空有还丹诀日遣流光等逝波

河上望永乐历历然感咏

河势冲冰水倒回两山寒色逼人来乡园云树虽相望客路心魂转更哀倦马争投盘豆驿饥
乌空噪赫连台劳生碌碌真何益欲访卢敖链玉胎

江楼寄怀宋中故人

二月春归杨柳条广陵风雨日萧萧题诗不到忘忧馆走马何年海雁桥江上归心怜草色城边晚景惜花朝梁园宾客天涯在空听钟声落暮潮

韩维藩兄偕令弟文尚买荷花数柄招同沈竹西客子张凤举集赏分赋得支字时别客子已十年计共维藩城南饮射时已五年矣

胜客招携继渼陂荷花恰有两三枝香来便觉风前好露重何须水面时一座尽看人似玉十年独笑鬓成丝射堂却忆垂杨郭画戟犹能中小支

送鲁庵之黔西二首【录一首】

使君持节拥双旌慷慨今为万里行眼底江山遵驿路天边雨雪计王程瘴花开处賔人侯蛮树交时岛吏迎最是

圣朝威德重旬宣从此倍声名

赠甯观斋太史

骑马冲泥拥鼻吟相过常得散烦襟题笺久废闲情赋对酒欣调太古琴忽念湖田应有梦尚依金马本无心荀陈风味西州泪三十年来拟再寻

论书答子文大尹

句曲论书已杳茫江陵劫火更凋伤参差𪔑鵝羣字颠倒山阴狸骨方拨鐙微言宁石室画沙真谛岂云阳传疑传信须裁取莫但随人筑道傍

寄江辰六郡守三首【录一首】

大道微茫不可寻极寻常处易浮沈读书未便伤无用为善何妨是有心笔势漫从愁里废天机且向静中吟迩来生计浑如此肯向南风慰好音

坐看

坐看山云意态迟酿成新雨到花枝盛来宝砚三危露写出幽人七字诗红药香中蚕浴後绿槐阴里燕巢时晚晴谁办樊川赋只许当年杜牧之

寄山人

荷衣蕙带山中好颇念花时独往来应有肉芝供晚膳定逢石髓助晨杯人间万事惊鸿爪园

客三春荐鹿胎遣有涉无费斟酌莫将新赋污天台

姜华林郡司马得红泥燕子将之句命同人赋之走笔应教

飞花无数委前谿雨雨风风打作泥紫幙最堪添旧垒雕梁偏称作新栖水边啄得红襟重柳外衔来绣翮低多少佳人喜相待珠帘高卷立香闺

赠宋驥先

生平梦想峨眉好君在峨眉住几年佛火飞来轻似叶香云生处白於绵道心已熟龙归峡定力方坚虎擘泉今日相逢如伴侣可能重问蜀江边

山行即事

姑射山前三日行秋林落叶乱泉声藕花已老谷登市牛力方新人饷畊冰雪远成仙客梦桑田近见使君清徘徊芦荻萧萧夜汾水东头雁影横

宿吴山寺楼简严灝亭先生

萧萧暮雨急寒榛独倚高楼少四邻江上鼙鼓悲鼓角下方灯火散星辰梅花何处三更笛寒食无家万里人不是相逢严仆射天涯谁念草堂贫

斋居

瓠落何须虑大樽萧然无客欸柴门春秋未习严彭祖纪传常轻褚少孙下泽几曾驱欸段长河终拟溯崑仑雷声太白连朝急次第墙东过雨痕

阁学李湘北先生有圣代求贤之作传和纷然酒次出以见示余自揆謏劣何能扬扞盛事但自述所遭而已并呈先生四首

迺开黜黜学邻虚岩壑朝朝信所如圣代自多优异诏微才真媿治安书观光未敢违先达作赋还当念遂初回首旧山冷猿鹤桃花流水乱春渠

故人清切白云司爱我阳春郢上词苦欲上书共徐乐不教下第叹丘为阳居久矣忘争席司马何须更入赀看取凌云新赋好几人先到凤凰池

十年曾着远游冠辛苦真同蜀道难颇有文章窥贾谊实无盐铁比桓寛金瓯本自无伤缺玉垒方期早奠安顿使河清频入颂君王含笑五云端

乡里常随马少游上公偏有白云求可能羣下留方朔先使人间笑许由草野那知千古事
朝廷自有八紘收玉杯漫道天人策牧豕公孙万户侯

寄赠吴武陵四首【録二首】

忆昔熊湘早济师曾同草檄佐军麾久从磨楯窥英略更向投戈得素知粤峤尽开唐节度沉
波已斂汉旌旗承

恩却绾麟符重玉带河边听竹枝

矫矫双鳧汉殿边元龙湖海气依然才优曼倩三千牍道长莠弘十五篇官舍从容闲对鹤南
风披拂静挥弦緑萝自此无招隐不种桃花种稻田

戏为西崑体二首

铁鎖高垂闭绮寮藥珠宫里上真朝梅花只许留宫额杨柳谁教绾细腰檻底芙蓉归宝镜帘
前春雨得生绡伤心最有秦楼客隔断红云听玉箫

朱雀窗前晓色开玉鈎窈窕碧绡回日高有客看花去夜半何人鸣弹来故把秦箏迎醉拂漫
将越练就灯裁

春风十里耶溪路网得西施不用媒

平遥野望

极目平原宿草衰无边春色鴈门来纵横野水灌婴庙突兀寒烟吉甫台绕指当年存苦语闻
鸡何处见奇才晚来浣得愁千斛仗有葡萄新拨醅

闻阮亭先生由户部郎中改官侍从二首

琅琊家学本无穷天挺英姿更不同事业已闻多际会文章今始见推崇宫人尽说元才子天
子频迁戴侍中入直那教早归院金莲常撒御筵红

频道新除下九天相过特地一欣然敢云贤人五百里的有才名三十年从此但栖天禄阁不
须更算水衡钱由来獎士玄晖癖犹问人间宝剑篇

某上人礼清凉归

雁门迢逖访三车稽首清凉链模铄去日但携铁如意归时却采金莲花毒龙制後争投鉢猛虎骑来竟到家回首戒坛石上月清晖依旧满袈裟

再过有道阡

有道芳阡接翠微石门松桧只依依风吹葵麦颺颺出日下祠堂蝙蝠飞垫角何人争慕义瞻乌谁屋早知机九原应使先生笑辇路而今走布衣

简张迴凡

闲坐高斋日几回秋花遍向小山开檻前最爱凉风入天际刚逢早雁来奇字问时宜载酒雄文草就许登台每当忧乐关心处知尔真堪宰相材

寄姜西溟四首【录二首】

名世由来道不孤鹏飞今已振天衢宫花偏向簪时艳鞞笏方从殿上趣盖代文章原有价掀天事业岂无徒大才难用真为用不复长歌击唾壶

几载铜龙自慨慷一朝重致姓名扬兰因出谷香尤远橘以过淮味更长争喜青云真得路休言白首只为郎家风亮节传青简再见新梧振凤凰

西子【华林姜公属赋】

响屧廊前夜月孤苕萝村畔没寒芜已教旧恨伤麋鹿又肯新愁入 鸪铁网皆云沈寂寞黄金任尔铸模糊江东救得无余事那复扁舟共五湖

明妃

不把黄金买画工进身羞与自媒同始知絶代佳人意即有千秋国土风环佩几曾归夜月琵琶惟许托宾鸿天心特为留青塚春色年年似汉宫

绿珠

盖代贞心盖代姿蛟珠百斛价难追已拌知己偕金谷岂肯才人嫁养厮璧月沈时香未冷彩云散後梦何之当年也有翺风侣不识春风又付谁

太真

人间天上两茫茫倾国倾城恨最长何处玉妃留别院尚教亭子忆沈香汉宫自喜同飞燕春

色争夸似海棠七夕牵牛私誓在同心愿只属三郎

虞姬

楚歌一夜动悲凉百战空嗟霸业荒子弟皆知归长者美人独解报君王
江东日落垓尘散原上春归墓草香回首五陵烟树尽千秋同作恨茫茫

咏白梅四首【录二首】

冰天曲屈托灵根犹喜春风入坐温绣幕灯来才有影雕窗月到更无痕
香浮东阁仙郎宅梦入江南处士村醉後不辞频酌酒也同玉女洗头盆

南枝不用怅无媒早向春前次第开烛晕红时明獭髓蝉光满处长珠胎
当筵恰对一峰雪照水何须两岸苔珍重纖尘都不到巡檐那许冻禽猜

赠孙次园二首【录一首】

七十二峰江上头松云抛却旧山秋孤怀耻傍三千客侠气常轻万户侯
鼎里丹砂烹上药机中锦字感新愁无端又遇穿鍼节不向舒州向冀州

城南晚归即事

曲江买酒不成醉归骑纵横散野垧日暮波光吞岸白雨余山色逼人青
紫钗红袖花边郭翠箔珠帘水上亭兴尽城南仍秉烛夜阑重市五侯鯖

长安喜遇孙恺士前辈

衮衮才名鹄鹭班几年江上有余闲暂抛紫府花前讌又看青门雨後山
久别各言魂梦熟相逢都讶鬓毛斑难争只有千秋业不与流光共往还

简长安谢静岩大令

终南荏苒三年住时有青光照画檐羈思只须游子领风流偏让使君兼
花前吏散亲调鹤竹里人归自卷帘今日方能到厅事可曾先动客星占

重阳

中条红树重阳节林下何人醉菊花海雾昏昏酿作雨渔灯点点看成霞
多愁且与消书帙有梦无端搅暮笳世事东西难自料高天风急鴈行斜

潞河简宋金宪时读其近诗甚奇郁不胜折衷

江上犹传宋玉名花开韦杜引双旌诗过青海才逾壮游入盘山梦亦清直道真消蛟蜃气仁
风方感凤凰声西江篇体渊源识仗与琅琊共主盟

寄盛悔亭【悔亭姑苏人流寓芮城之朱侣村者已三十年矣】

岩分悬溜趣晴岚美尔溪东寄一龕桃叶不须思白下梅花尽许似江南窗含晴雪书偏妙坐
拥青山赋正酣珍重题笺报寒食诗名酒德两无惭

柬宋牧仲先生

相国风流尚未遥翩翩公子复中朝无诗堪寄忘忧馆有梦常寻海鴈桥此日谁能追宋玉临
风我欲酹燕昭紫芝一接尘心尽重向终南劬药苗

题陶庵小像

杨柳春风廿四桥酒旗歌扇笑相邀坐中红袖窥双鬓眼底青山閱六朝盛事尚追桃叶渡乡
心犹系广陵潮头颅如许升沈尽令仆闲情付玉箫

登河中郡楼

从来今古亦关情况复登临感乍生人代已随晨雨散河山不改夕阳晴野花开遍薰风殿春
鸟啼荒魏豹城日暮更闻原上笛谁能此地不沾缨

莲洋诗钞卷四

卷五

钦定四库全书

莲洋诗钞卷五

蒲州吴雯撰

五排

寄呈梁大司农

承明曾奉召玉署喜相存国士知何忝尚书道最尊孤忠通贝阙素念托棠村
驂裹途方远鵬翼正蹇愧无将履敬先得下堂言荐祢书仍在投琼语更温
何曾分得丧端不异寒暄座席春风接长途夏雨繁看花怀画省折柳记青门
岂待无相识方知感旧恩

呈五崖伯二十韵

京洛承顏久嵩瀋问道稀一年辞贝阙千里覲慈帏辛苦年空长艰难事日非
心堪縶茧乱身岂食熊肥扬子经抛案安仁镜掩闺文章成聚讼辞赋得长饥
天上愁难寄人生愿苦违长途悲驂裹闲幔下蚶蜊乞米收残帖看山别旧矶
金兰增郑重昭穆藉光辉礼乐遵陶铸英才仰范围兼崇乾竺业曾少汉阴机
朗监千人爽风清衆议归有诗贻杜位无绢授胡威对酒灯花落论文燕子飞
素心期龟勉神理尽精微化被苍生雨风行海内衣一时钦紫气不日陟黄扉
鱼水存符契风雷仗发挥千秋三不朽所得是皈依

呈补念秦公二十韵

一代文章伯千秋令誉长笔曾专国史名早动

先皇草蹴龙池緑衣沾凤署香登朝题琬琰取士得琳琅百粤烦旌旆南天仗父康
三洲镌玉乳五色馭神羊吟带罗浮雪资捐翡翠装节回梅鋗岭綬照客星堂泽与桐溪润
声留大滌苍更闻秦塞曲亦藉汉庭良黑水军容肃红盐幕府张贤劳久西海淑问复南昌
劒气丰城剖仙峰玉笥藏虚延礼孺子道济溯旌阳近眷盐梅托新猷海岱傍岂徒民愠解
顿使国威强廿载皈依切三余景物芳龙门登百尺虫技献千章葛帔还能惜金兰自不忘
从斯百宝色沐浴发奇光

观海

始识朝宗大登台覲广洋乾坤成瀕洞风雨失寻常日照扶桑小云流太古荒蛟龙通窟宅鱼

鼃没桥梁一气元精合千帆岛屿长飞仙如可接鹤驭转茫茫

呈雨亭王公二十四韵

淮水波澜远琅琊庆誉长金貂仍棨戟玉节复岩廊遮舫春云绿随车夏两香英风飞紫电绩学擅青箱章贡留棠荫河汾仰绣裳聪明净冰雪特达有珪璋并邑沾恩泽苍生乐寿康题笈才敏捷博物鉴精详劔许司空识书惊内史良英声高季布雅调寄韬光八座行当陟三台计日将昔欣瞻海岳今再覩星凰霁色迎阶爽薰风入座凉隼旃花隐队铃阁竹分行玉屑闻清语珠躔慰面墙谋生何太拙投老转潜伤日月荒松桂乾坤失稻粱铜龙追献纳金马梦趋跄栖逸修丹竈晨昏理药房半鸡惭置度全豹慕登堂拔薤观新政怀婴际法航即斯成锦里随处得沧浪麤粝贫能给虫鱼注不妨索居久寂寞从此快翱翔

蒲城郡南旧有海渚神庙颇极壮丽自大河去鸛鹊楼下殿宇渐成荒废戊申初春过谒不胜感慨乃为诗十韵以志之

余有济川志徘徊海渚宫风霜残殿瓦葵麦遶帘栊老栢无全绿雕梁有断红尘埃生白帝樵采入黄熊倾倒天吴像荒凉野兔踪人情随显赫神气有衰穷昭代方崇祀丰碑尚记功何妨使丹墀重令辟蒿蓬日月开朱户罽毼冒碧空他时瞻拜下俯仰快朝宗

雨亭王公雪中旋旆喜成二十韵

于役晋阳天归途密霰悬山中琼作树河上玉为田鸟鼠迷空谷关城泐冷泉人家增爽垞樵路失蜿蜒送腊梅分纈先春柳破緜坐来消玉马行处扑金蝉拥骑寒侵袂微吟冻入鞭歌楼薄酒力僧舍就茶烟思欲追梁苑才应美惠连汾阳怀帝子姑射对神仙黄竹謡寧述幽兰曲已传洁清鹇并素浣濯鹤同鲜长养资调燮阴阳免伏愆风云瞻气象珪璧契方圆每伏陶钧力常叨造化权本然怀洁白更取励贞坚值物寧移性班形幸自全袁安谁枉辙江革尚分疆徒领风人旨难酬郢上篇丰年知有瑞先报上前

秋日再过王官谷十四韵

表圣幽栖处白云解鬱蒸典型终古峻顽懦百年兴空谷何人到孤亭我再登磴花纏细石岩树曳高藤危磴千峰翠飞泉万仞冰清晖闻白雁爽气击苍鹰诡激寧伤直徘徊转见弘哲先迷柳璨节已信王凝龙纪辞荣早鸾台饮社曾有怀方堕笏无碍任分缯花苑谁留客苔龕尚见僧避喧勾漏并絶粒首阳仍胜日诗堪述秋霜史亟称只今书劔外何处得良朋

送桐城相国二十四韵

调燮归元宰勲庸纪上贤立诚通黻座主敬格皇天勲恳趋三殿匡勲计万年豳风七月古丹宸六箴传日月资开霁乾坤仗斡旋维星登皞皞终日尚乾乾尽瘁真无负和衷道已全鞠躬

移带孔揽镜讶华颠遵渚鸿犹集翔云凤已骞悬车应有礼生耳敢贻愆【古谚仕宦不止车生耳】国计丹心系乡思绿野悬天阶申虎拜山色乞龙眠

主圣恩犹渥臣忠眷自专翻怜冲腊雪特许踏春烟芳草安车稳春莺旧谷偏荣光过受广乐事胜彭佺玉陞回仙佩沙堤敞别筵国尤思柱石人尽羨神仙燕许文章大韦平事业聯鸣珂开竹里列戟继花砖黑发仍枚卜黄扉更後先参苓惭药笼桃李附兰櫂皖水思徒结灞山梦日连青门杨柳色惆怅晓风前

莲洋诗钞卷五

卷六

钦定四库全书

莲洋诗钞卷六

蒲州吴雯撰

五絕

野渡

野渡添秋水危桥一线通临深能自力终不污泥中

渡河

曲岸鸳鸯稳田村荻苇秋伤心今昔事不肯付东流

宝公

拙龙千柱少巧鳩一柴足忽罢濫阳工西山坐茅屋

卦山四首【錄一首】

石路何盘盘老栢一万树风吹栢子烟引入繙经处团云寺即事以空山不见人但闻人语响为韵十首【寺在山海关錄一首】

危坐傍东岩衣襴缘苍鼠恰到会心时前峰对无语

同雷道生昆仲晚眺

沙苑晴无风金光乍明灭苍茫河渭间人家在春雪

题孟氏山堂

弹琴坐风柳明月临高台新凉破清晓一一水花开

再过山堂三首【錄一首】

新荷满清池屈曲朱阑静波光晓镜开半入垂杨影题梅渊公黄山画册八首为陈子文【録二首】

懒云横山腰怒云起山足千道百道泉一间两间屋碧玉作屏风苍苍沉落照孤亭阻白云终古无人到

颍川宿公?先生书屋

北风无停时声动万竿竹凄然聽已悲况是他乡宿

邯鄲歌

暮踏邯鄲月晓踏邯鄲尘邯鄲朝复暮不见邯鄲人

怀子文

鹿脯曾留帖鷺羣更颂书还经王母庙不饌锦江鱼【初子文传转蜀饒】

晚春五絶句【録一首】

鸂鶒交前浦鸳鸯过别滩莫因风雨恶吹动钓鱼竿

见山色不断口号

芳草正萋萋垂杨丝不齐青山如送客直过鴈门西过子覲不值云在宫东酒肆二首【録一首】

行行緑陰下禽声隔溪水一片华山云吹入宫槐里送张翼云之马首兼语续方山之游二首【録一首】

春雨湿桃花匹马花中去若过神福山为礼繙经处

出都别友人二首【録一首】

匹马青门外垂杨覆板桥莫伤摇落尽犹有最长条

出郭

出郭饶清事溪流一带斜浮萍翻恼客一半是杨花

西溪

西溪清浅流洄洄杂菱苕白鸟忽飞来萍开见山影

谢亚夫先生送桂花酱

桂父昔食桂分此为清惠采得小山花酿作江南味

女朝汲

郎行秋涧上妾行秋涧底秋涧浊水泥不入银瓶里

游栖岩寺六首【録一首】

危磴一百盘岩风荡林蕝滴沥石门泉飞作人间雨

访隐者不遇

白云满前山山门乱溪水幽人何处寻立久闻松子

和闻雁

月里参差影风前次第声清商天外落多少世人惊

怀山堂

山中有草堂未得山中住白云不让人占尽读书处

晚行山下

林深如风雨黄叶下山路日暮不逢人寒溪独延伫

送张健一之魏郡三首【録一首】

颠倒不成眠残钟天欲曙何事最关人闻君濮阳去

莲洋诗钞卷六

卷七

钦定四库全书

莲洋诗钞卷七

蒲州吴雯撰

七絕

杯渡浑河

香象截流能迳渡其如老象没波难却喜一杯无罅漏果然安稳出桑乾

安昌絕句六首【有序錄二首】

【庚申夏仲余方抱安仁之痛更涉奉倩之疾薄游安昌情思拂鬱行药郭門輒成小诗六章触兴不一难责伦次聊存楮墨以备岁月云尔】

蒲叶青青夹堰齐残云掠雨郭門西綠杨尽是伤心树只遣黄鹂一个啼

半是愁中半病中伤心不为梦黄熊蔗浆难解樱桃热愿乞仙人宝扇风

感伤四絕句【錄三首】

皎皎依然明月辉宝奁尘掩事全非青鸾双影知何处苦道瑶池使未归

惆怅零香钿合封红绵小绣损芙蓉绮窗抛掷谁收拾珍重当年锦线缝

二十年来晓梦空蓬山弱水信难通桃花谁道三千岁难抵春归一夜风

咏南将军事一絕

呜咽临淮几乞师广张声乐复何为灯前难忍千秋泪洒到当年断指时

咏邳城杂事五首【錄一首】

安汉将军安在哉七十二塚自累累而今碑字传梁鹄不复重留受禅台

桃花夫人

桃花夫人好顏色月中飞出云中得新感恩仍旧感恩一倾城矣再倾国

上蔡道中雪

车箱摇摇秋草澁上蔡城南官路直东门极望白茫茫风前一点鸦翎黑

初祖心影石

翠巘嵯峨花雨随孤云片石妙难窥分明只履西归去五乳峯前又是谁

苏公墓下作

青山送客九十里宿草伤心七百年欲拜峩峩索灵翼正逢风雨暗长天

文殊大士洗象图颂

狂象曾闻奋六牙而今驯伏捧莲花浮幢香水慈悲甚洗尽恒河沙复沙

书王平子传後二首【録一首】

第一声名品目非雕窗争脱小郎围生平无事强人意惟有泉台慰陆机

再过渭南

鸿门亭外酒旗斜半日村前水映沙三十年来重立马鷟声犹坠县楼花

春

冰雪棱棱作岁寒而今也到早春天郭边暖跃长河鲤门外晴开太华莲

赠谢鹤庵二首【时将纳姬】

品茶大似陆鸿渐较水还同刘伯刍纱?笼头煎总好仍须红袖捧甃瓯

杨柳东风柔软条真如十五女儿腰香山居士风流甚待选双蛾仔细描

题似鹤先生画卷三首【録一首】

图中亭子比休休瀑布真悬万仞流往事都成鸿爪雪只余墨妙古今留

卢子凝兄牡丹四株有以六十千易者却之记以二首【録一首】

世态纷纷笑不支移山伎俩久如斯因君始觉黄金贱也有铜山短气时

奉和阮翁花下饮

风风雨雨道途难犹及长安花未阑便脱征衣花下醉一枝低亚玉栏干

戏答豹人三首【録二首】

日夜东风太剧颠落花无数客窗前只愁吹醒扬州梦不得高斋自在眠

弹箏莫怨白头吟卖赋常思归旧林不是鱼竿愁决絶茂陵佳丽要黄金

一片

一片花飞点客衣纏绵珍惜不多时可怜都作关心梦忘却东风唤子规

虞乡道中口号四首

千仞飞泉下石门岚光霞彩变朝昏樵人笑指司空谷浣女方归洗马村

紫翠纷纷入夕霞石林东去有人家木棉花落稼将熟犹见黄牛翻水车

枫林飒飒石磷磷壠上饥乌飞趣人烹羔酿秫劳田父打鼓摊钱赛社神

舍南舍北蔓寒瓜东门有池方沤麻老农何处牵黄犊行过一湾红蓼花

余有虞乡口号曾寄正阮亭先生家弟来汴道及送子文絶句因谬许鄙作有黄绢之赏遂再赋此亦窃附唐人本事之意云尔

入洛游梁事不齐传来新句感幽栖山人此夜还山梦扁鹊祠东绢市西

心契无为身未能栢梯山寺赚闲僧相参有句仍无句裴迪终当避右丞

寄董骠骑

少年使酒闻轻侠退老江干数雁羣世上可怜多醉尉不须重说李将军

戏赠李武曾二首

山公爱客绮筵清灯火笼纱妒月明此日相逢未相识江南新到庾兰成

沉醉东风卢女弦泥人佳句满题笺预愁长夜无春色遍种桃花作墓田

贻永乐旧主人二首

不见仙人侯道华攢攢谁食枣如瓜谿南空作七年住水鹤声中处士家

窃药人应得药人翻从混沌见天真无端贪作凌云赋辜负桃花玉洞春

河桥

河桥新柳渐成丝社燕飞飞二月时每惜春来只为客东堂辜负好花枝

咏史

緘口虞箴笑汉京逆鳞谁复更相撓一书谏猎千秋重不敢词人待长卿

题阮翁画册二首【録一首】

惨緑深红正满枝双双蜂子趁花时更看蝴蝶车轮大只少麻姑背上骑

送阮翁祭告南海四首【録一首】

岭气如蒸暖不收行人都脱木棉裘阳春一路通南极直看桃花到广州

去婢怨为元彦赋二首

门巷春风柳挂丝去时成恨见成悲含情脉脉两无语回首斜阳双泪垂

朱字箜篌暗网尘伤心岐路是前因郎心若念当时意莫把金钿与别人

戴尚书竹

湖州太守贫方善协律郎官老更工惟有尚书最尊宠闲中写出葛陂龙

之葛沽舟中杂诗四首【録二首】

晓日龍嵒近直沽遥遥帆影出平芜眼前芳草衡湘色只少春山叫鷓鴣
短蒲沙带退潮痕花里楼台柳外村暂歇吹箫倚双桨闲看丝网摘河豚

题孙孝堪渔父小像四首【録一首】

药竈茶铛对水鸥萧然身世两无求钓竿虽设丝纶卷怕有蜻蜓立上头

题阮翁壬寅诗卷五首【録二首】

綠杨芳草可怜生花下题诗野寺行江北江南烟雨路伤心重付庾兰成
姑射仙人真絕尘江山依旧墨痕新此中消息传灯似自分当为得髓人
途次偶忆

洗马村东一顷田王官谷口聽飞泉家人更有鸾台侍便醉虞乡绢市边

题沈汉仪小像三首【时自蜀还吴録一首】

絕代风流酒一卮东阳才调比陈思邯郸会发天人叹应见搔头傅粉时
偶读摩诘诗感题

入道悠悠怅未能萧然兴味已如僧周妻何肉两无损只觉中年愧右丞
送贾积石

拌醉天涯日几回一朝岐路怅衔杯玉兰花发君应到新笋生时我亦来
赋得海月半轮高分十五删四首【録一首】

百尺楼高玉半弯清宵无梦落潺湲错将碧海滩头影认作深闺镜里山
偶兴

綠树茏葱羃晓烟城隅荷叶正田田黄鹂交语鳴鳩醉浑是江南孟夏天

奉题阮翁雪谿诗思图三首【録一首】

墨王亭子树桎杈诗格维摩第一家碾碎玉尘带香色不知是雪是梅花【公许山冻别业有墨王亭周栎园先生诗祇有墨王亭畔水空明与客忆王郎】

题禹尚基鸿胪卜居图三首【録一首】

年来百药瘦崢嶸也似仙儒也似僧只是鱼鰕都爱惜渔竿休画画红藤

感悼江解州辰六

春首华筵重一金大寒冰雪感知音牂牁名士今何处谁辨相如作赋心

四月

四月湖湘芳草铺竹枝夹岸客船孤长沙自昔伤心地亲向青山听鷓鴣

江风词四首

四月江头踣躅红江边愁雨又愁风泊船休近黄陵庙斑竹摇摇恼煞侬

江风吹浪生白波往来舴艋冲浪过浪花起处红衫湿换着湖州生线罗

一夜南风吹不休侵晨晴日满船头江乡见惯闲风雨说着风波也不愁

估舶新来换宝珠船窗四角结流苏却怜西子无缘分晚嫁黄金范大夫

偶笔数飞卿

闭门闲出太匆匆小倦归来意倍慵床上残书风不定花须吹在砚池中

竹屿

竹屿湾环抱水亭蛟珠不定芰荷青阿谁轻拨兰桡入打破春塘百子萍

潭州杂诗三首

潭州一住四十日亲见巴帆枕上来岳树尽从朝雨绿湘花更着晚风开

无数蜻蜓上钓竿花枝照眼水漫漫墙东尚有闲田地犹可添修鬪鸭阑

方山五首【録一首】

山色参差碧玉围松声花雨海涛飞晚来小坐盘陀石闲看山僧补衲衣

阮翁斋啜武夷茶同令弟幔亭五首【録二首】

幔亭峰下曾孙宴嫩荚惊雷又几春解辨莲花香味好端应曾是此山人

大称齐鲁小邾莒更有麴生中逗挠若待伐毛三洗髓羊肠车转荡嫖姚

题云林秋山图为查德尹

经营惨淡意如何渺渺秋山远远波岂但穠花谢桃李空林黄叶亦无多

临汝道中

桥下菖蒲桥上柳南风吹过緑生凉金衣公子浑相识宛转留人到夕阳

阌乡道中望戾园

思子台前望落晖泉鸠烟树远微微伤心落叶哀蝉曲直到而今恨不归

题黄湄给谏红袖乌丝卷三首

白玉阑干翡翠牀林风吹动绮罗香黄门搦管妖姬侍仍是君家宝绘堂

纖指玲珑楮墨芬花前来往石榴裙戢山扇子谁将去不解风流是右军

梅花赋就擘长笺七十鸳鸯画里传比似扶风真托兴後堂原未聒彭宣

寄佟闻喜四首【録一首】

瀾?双双傍暖沙野田将次有桃花即看雪後添春水流入甘泉润万家

留别仝车同三首【録一首】

文章命達两难齐五十青云路尚迷夙昔家声原第一暂将牛鼎尚烹鸡

右军书法尚矣而十七帖尤属其最世传少有善本西溟姜子独有僧权不全旧搨良为至宝
遂题五絶句於帖尾【録四首】

谁言野鷺与家鷄自信张芝雁阵齐续得过江书十纸神明先伏庾征西

裴业贞观入贡初烟飞雾结状何如外人千载尤珍重不数严家饿隶书

日给櫻桃子一囊山川游目乐徜徉尚平心事谁能识折柬还留种树方

悬溜山前覓紫芝乐遵沧海去无时神仙游戏皆龙凤多少儿孙饮墨池

子文赞府得安邑後野人之贺已不受而更损绢为余强索得之戏赠二诗【録一首】

三尺鷺溪罢剪裁处膏不润亦奇哉从来安邑多相累翻向先生索袜材

春晓曲

辘轳哑轧宫井澁花影玲珑半帘月美人睡起梳晓鬟锦帆过处雕牕黑

怀阮亭先生

琅琊天下推词伯果有文章起一时何必桐花相郑重芜城自有建安诗【词苑称先生为王桐花】

题降龙图

香水无波道味真谁言龙性实难驯试看薄暮安禅处一个鉢盂五百身

伏虎图

一啸惊摧山木枝腥风过处血淋漓老僧视尔浑平等正要牵来当马骑

怀子文二首【録一首】

西出萧关见瓦亭六盘山色六盘青怀君多在弹箏峡载笔重来验水经【子文臯兰载笔论王母宫碑刻最详】

哭张三公路之丧而送之十首【録一首】

阻絕河山少见期神交千里只相思相逢便道參曹洞銀盃空齋大雪時【君嘗簡余云此間有參洞者速來一道至則無有蓋戲余之嗜禪也】

獨坐看月三首【錄一首】

獨對高旻發浩吟夜涼風露淅煩襟浮雲斂盡冰輪滿萬里青天萬古心

還山坐向辰竹齋

春草龍池奏賦同一年奔走日華東而今始信忘機事閑坐修篁細雨中

自郟縣至南陽五日山水風土不無感慨成詩九首【錄一首】

東飛駕鵞西鵠鷁澗底菖蒲尺五長寶髻羅裙何處是青山彷彿杜蘭香

送陳子厚之燕二首【錄一首】

玉溪東畔柳如絲腸斷人間折柳時寄語春風道珍重桃花山店夢斑駁

寄展芝亭并謝送花樹四首【錄一首】

海棠兩株嬌可憐買須三百青銅錢暫應忍醉不沽酒換取風光二月天

將再之吳門四首【錄三首】

蛩語吳歌半不知沙棠青雀影參差行人多上真娘墓酒客常留短簿祠

綺戶雕窗障綠紗笙囊夜半嚼紅霞不知此去長洲苑還有當年小玉家

迢遞關門唱五噫那能佳麗減鄉思可憐也有淩雲筆只與吳侬較竹枝

珠樓

珠樓十二嚙金蟾樓外春風打?檐齊道天香何處落不知人在水晶帘

閨思詞

細雨茸茸楊柳津當時曾比送行人縱然不向臨邛去多恐歸來已暮春

庚申仲春寄子文贊府三首【时住永乐风雪薄醉閱赵帖遂书牋尾奉達 録二首】

松雪兰亭跋语奇闲邪规矩又谁师临风却想翩然阁正是更阑鬪茗时

疑义何人可较量风灯薄醉淨琴张病妻却上平原帖鹿脯端能远寄将【时妇病甚】

为陈湘殷翁题画五首【翁子姬远姬远子友仲持画册至鹿城索题 録二首】

苇照明霞秋水平相呼相应趣和鸣同居个个无猜忌真是人间好弟兄【芦雁】

旅骑三冬不肯行渔阳腊雪太纵横春来合向金鷺馆消受花间一鸟鸣【花鸟】

壁上见子文大尹题

昔人抱犊三年学我亦香泉两月停破塚不须求笔法牙籤捡出翰林经

喜晤王清远时余将还河中清远亦之官荏平五首【録三首】

燕许弓裘鸿渐宜相逢依旧落花时竭来重对山公席只有劳生鬓已丝【曩与清远相见年髯俱髻龄今阮翁再命饮清远方壮而余老矣】倦游却愧长卿才二月还家花尽开最喜晴莲千仞色清光飞过大河来【余家郡城正与莲峯相对门外朝夕见山色如碧玉】

握手东西长短亭翩翩家学且传经怀君一路王孙草直到鲁连村畔青【清远时方为荏山学博荏有鲁连村即射书处】

再题喟亭看梅卷三絶句【録一首】

人间万事等浮云山店溪桥野鹤羣输却衆香缘分在梅花好处便逢君

赠谢牧四首【録一首】

蟠桃曾赐藥珠宫五马新看佐郡雄却羨官厨风味别金盘先荐荔枝红

除日雨霁晓起即事简赵将军五首【録一首】

碧桃有意已含紫榆莢无心迴带烟取次将窥湘女佩逡巡全放沈郎钱

题黄湄都諫诗卷二首【録一首】

十九首诗惊碧落一千年调记烟鬟少陵无语昌黎醉只许黄门到华山
为阮亭先生题画四首【録二首】

谁画江云海雾闲长风披树雨连山此中景物都何似应在衡湘上下间
晴云不及雨云多石趾江心荡白波卧听鷗鵠闲不住几番隣舍乞渔蓑
送张确山四首【録一首】

咸阳芳草及时新偏向渔阳踏晓尘只是渭城三叠後可能忘却卷衣人
送魏闇之还里二首【録一首】

蒙蒙细雨海东头尚觉寒生日本裘渐远蓟门见芳草春风吹过古并州
禹州题壁四首【録一首】

走马襄城七圣迷禹州城外草萋萋来朝又宿嵩阳寺石壁先听震旦鸡
过大卤访傅青主先生时已移居缅然有怀即书此寄意四首【録二首】
松庄烟树十年余寺路相逢笑下驴今日重来浑不见白云深处又移居
京洛无端迫客尘也知瓔珞是前身几时得遂东隣约金粟园中两道人
见公?先生手蹟感咏之下不觉涕零四首

鸣雁城南春水生陈留风俗阮家情一行书信千般思十五年前颍上行
荐祢当年墨未乾伤心耆旧已凋残孝标没後交情少谁惜人间葛帔寒
一笑金徽未落声风流应主芙蓉城独怜近诏求遗老不使君王见长卿
等闲弥勒便同龕又与朝云作晚参座上当年听丝竹西州慙负哭羊昙
励梦

昏昏醉梦日浮沉难处方知用力深不是梅花香色好如何链出广平心

题莫亚夫先生小像三首【録一首】

补袞即是仲山甫浣墨还同王右军比似当年苏玉局相随賸有两朝云

题杜少保园时雨中过

暮雨潇潇百一园上公别业倚云根千回流水不知处一迳野花开到门

长安初春感咏四首【録二首】

十二金门平旦开纵横玉勒早朝回笙歌日暮能留客谁道公孙不爱才

槭槭霜林少定时东风吹动隔年枝白藤书笈青丝马独有伤心沈亚之

赠少年

二十少年望麟阁盘马弯弓气磅礴眼前都尉知是谁云中但看双鵬落

入晋怀长安诸公十首

浪迹无端入上京也教词赋动公卿从今好绣平原像莫更长吟瘦马行

中朝爱客推司马【龚公芝麓】海内谈诗仰右丞【王公阮亭】每忆花时留颍水【刘公?】尝愁雪里送鄱陵【梁公曰缉】

啓事归来昼掩关论诗谓我似青莲难忘大小欧阳体温语时将勉後贤【同里杜公振门书法率更父子】

纷纷词客日相夸大雅堪怜委乱麻每怪玉遮古情性而今翻觉未聾牙【汪公荅文】

琴酒何曾累一官清思厚力砥狂澜相过便觉尘心尽天半峩帽雪後看【程公石】

王叟顾叟致不恶屈郎李郎才亦希典型未可轻遗老投分由来有布衣

阳羨书生乍相识题诗送我归中条久无体格追风雅尚尔风华掩六朝【陈其年】

阿大中郎旧有名相逢杯酒太匆匆邮亭数见题诗处知尔归程过宋中【彭中郎】

雨声激楚清秋时读尔从军塞上诗四坐一时齐感激不须急难邨中儿【李天生初未相识】

但於阮亭先生处读其塞上诗百韵心甚异之後闻李武曾云赴一故人难不憚数千里外倍道即至天生真异人也】

聚散惊心不可裁天涯云水思悠哉何年樽酒梅花约重向昭王百尺台

客中二首【録一首】

白藤书笈太伶俜剩有南华一卷经独坐长吟山日晓竹窗影乱凤凰翎

希夷先生颂

占断莲花第一峯白云深鎖碧芙蓉石铛半滴先天髓濂洛关闽尽得宗

宿苍陵峪

谷树萧萧受晚风水萤轻扬小山丛今宵秋思知多少尽付寒流乱叶中

咏汉史

宫帘寂寂漏声长几度黄门把緑囊痴絶昭阳双燕子一心飞向定陶王

见华阳道人蒋虎臣先生壁上和女郎诗题其後三首

闻道华阳句曲仙布衣粗粝学枯禅如何也有闲情赋写到青楼燕子边【诗中用关盼盼事】

看着名山杖古藤蒲团夜坐冷如冰只今绮语留金粉尚尔天花着定僧

曾与芭蕉作晚参三生慧业入瞿昙老来剑阁无消息重向峨眉扫旧龕

镇州荷花

镇州荷花一万柄鵙鵙相争飞安得红香最深处玉箫载满酒船归

城南城北皆荷花正对城门是酒家下马犹能再斟酌醉临明镜看吴娃

上谷早发

上谷东来晓气浓沿溪烟树緑含风郎山挿笏青冥里大似诸郎立雨中

匏斋黄葵同方山紫海两先生作二首【録一首】

日日城西便忘归北窗秋色杂晴晖坐看五叠湘裙软贱煞人间罗绮衣

班婕妤

翠辇当年着意辞何曾团扇更寻思一从长信宫中去总使秋风也不悲

逢赵秋谷太史三首【录二首】

大庾梅花发古香罗浮山下足徜徉菖蒲九节亲能斲好驭仙人五色羊

广州历罢又苏州也向真娘墓上游饶尔广平心似铁眼波横处易悲秋

题沈礪房射鸭图三首【录一首】

腰腹未作东阳瘦冻吟岂便东野穷爱对浪花酌铜斗不妨料理竹枝弓

次青霞韵三首【录二首】

生平恩怨任茫茫只有名心尚不忘百轴雄文诗两卷白藤随处发奇光

白鹿骑来任往还城南剧饮发朱颜三千玉女浑相待又采菖蒲入华山

山行即事三首【录二首】

燕子乌衣雉子斑黄牛舐犊水牛闲迎人无限掇蓝色布谷声中四月山

山云结作盘龙髻水荇花开似宝簪妾自当垆郎自饮从来不解凤凰琴

莲洋诗钞卷七

卷八

钦定四库全书

莲洋诗钞卷八【补遗】

蒲州吴雯撰

五古

中秋李太守招集崇实书院看月

秋半物候肃雨余山光净恬然讲院中耳目絶嚣竞我公比秋月相招恣清咏顾此月常有此月独端正光开海上云朗挂天边镜肯辞酒盏深苦乏诗思横徘徊不知归清景惜难更不觉既醉余疎略赖寬政

失题

本然无去来云何有梦觉不见三途苦宁识四禅乐宝月湛空明何从受顛扑往来三十年无乃妄卜度今日蚕丛路当时雪山阁都作一尘看光辉照寥廓

上豫抚徐青来先生

杨柳春风生春烟浮吹台驱车燕赵间仍复大梁来公子緬千载侯生安在哉弹指阅今古惜此年光催早年具微尚箕颍慕高躅曳裾向侯门艰辛为亲辱夫子清静心因为万井福再拜矢皈仰道风见肃穆清标凜寒玉仍与物为春羣然惕冰渊中实含至仁师表范百寮康济归兆民繫余借楷模亦欲善其身嵩华岂不高河洛岂不远瞻企复溯洄始信自轻浅昨更礼白云秉戒自黽勉有道皆可正敢较渎与谄大人本无我品类皆陶熔惟兹大造力知不弃顛蒙循步依崇高客心宁匆匆徘徊对霁景花间问春鸿小人诚有母八十缺饗殮禄养久不能又复违晨昏劳生何日闲仆仆辞国门所嗟蒲柳姿早凋复何言【公讶早衰故及之】

挽张圣佩孝廉

万事皆空虚一念独真实当其坚固处终古不泯灭呜呼栢岩子感我最亲切投分尘外结契金兰侧论文每夜分杯铛必狼藉嗜古同一癖名蹟肆罗列指瑕各中癖赏奇互探秘两两会心处一笑无言说有时共挥毫一研错双笔君书我最爱我书君尤悦书成互盘礴气应蕤宾铁并骑看春山散发舞秋月狂歌惊僮仆清啸动寥沕君本磊落人浮名等一呷折腰轻五斗息影罢交接我尤慕蓬闾所恨弱水隔中条有茅屋偃仰聊自适雨畊薇蕨紫夜舞蝙蝠白君每欲相过书问空重叠昨日晋阳旋慰劳悯行役苦欲留我住倾倒共朝夕游子念慈闈八

十难久别上马各恋恋皆如有所失到家曾几时闻君成永诀惊心如噩梦不觉肺肝裂呜呼君行谊必当享髦耄呜呼君相貌必当捧符牒胡为百尺桐无风自摧折幸有丈夫子林立皆英哲幸有兰玉孙神驹争齧流光本飞电百岁同恍惚何须分久暂彭殤一轨辙况君过知命齐物泯欣戚所恨同学子一旦少矜式百里齎镜具刳羊恐无血鸡絮陈几筵物菲意非?悼痛为此辞九原应酸恻

七古

送大凯之官宕渠

嘉陵江上草萋萋海棠花开云锦迷使君三月到官去相送春风随马蹄十年梦想峨嵋道汶岭何曾逐登眺使君今日宕渠行美杀山川入妍妙使君本然清浄身为政能使风俗淳游讌何妨临篆水熙恬端可化賔人使君鎮西近梁益我欲因之慰畴昔巴马骑过陈寿祠栈云引到谯周宅更访仙人谢自然遗踪灵水涌金泉馭风亭上还须到下看齐州九点烟

李苑仙携酒过石鼎园诗以留之

东风连日亦太甚桃花杨柳半吹损却喜君能载酒来石鼎园中共我饮今日风中君又归河边杨柳尚依依何如持觴不归去醉来便卧垂杨树

失题

【缺】宝【缺】姿宛如玉锦鞞朝过中条麓白马骄嘶不肯行为惜障泥綠杨曲二月韶华莺欲啼眼前芳草又萋萋画省星郎雅不羨吟诗直过杏花西

谢鹤庵自蜀归

鹤庵老子神骨清还丹欲学陰长生生平最爱蜀山好投老真为万里行杖上江声杖底山蛾眉光彩有无间荔枝岂但经年食又道亲尝甘露还蜀栈勾连记去程归来三峡识夔荆细腰宫畔阳台梦尚有朝云暮雨情洒然万里竟归来握手风前坐碧苔只恨相逢歌哭并【时张圣伯仙游】新诗当作杜陵哀

五律

寄呈徐子惺方伯六首

帝眷殷南服朱轡下鄂州垂鞭碣石馆清啸武昌楼挽粟饶河内筹边重列侯只今余战舰春雨暮滩头家风追孝穆薄海大名垂岂借江山助宁矜藻绩奇漫郎空凿石元凯但沉碑争似高文在流传叹色丝百折壶头路劳生不可禁已垂元亮绶难任少游心拮据随戎马艰难负

橘林依依宫柳色北望惜繁陰鸚鵡芳洲好他时几往还徵歌山水曲问字茝兰间簪谷邀青
鸟寒溪对白鷗千秋幽絕处特许弄潺湲

载酒遍名蓝弹箏倚石楠尊移万松岭诗比百花潭耳热同分蔗林香自擘柑奇峰九十九醉
墨洒沉酣为报湘波静天南罢鼓鼙功存陶士行劳并庾征西素雁来何处丹旌望转迷支牀
鸡骨甚行路亦凄凄

汴水九日二首

白雁黄花节他乡倍黯然风犹吹野马日不暖鸣蝉冷蘂侵篱湿晴沙裹浪圆南来有书信好
寄鵲鵒篇黄菊东篱好家山更若何雨看嵩树湿云忆楚台多笔札销闲昼壶觞托啸歌高斋
稍偃仰也胜洞庭波

冰鱼二首【存一首】

珍味海门有盘飧山客新归应梦龙女出已泣蛟人登俎当霏屑承筐乱错银桃花三月水相
忆隔波臣七律

赠雪客

冰港东连海气昏高斋俯仰壮心存悲歌漫托诗千首慰劳常烦酒一樽冰霜岁晚寒犹急草
木春归绿已痕再向天涯叹鸿爪玉兰花下有柴门

哭某人诗四首

频年京洛浣衣尘本是河阳旧隐沦感因道德交方古契以文章意最真忽【缺】海南题柱
客浪传河上纬萧人许尔千秋是知己伤心便作九原身

片语端能订久要合欢花下和吹箫琴樽笑语刚三日裙屐风流隔六朝岂敢再过丞相府惟
应常梦侍中貂夜台先有阿蒙在且省茫茫怨寂寥

早年声誉重瑶林中岁飞扬衆所钦安世诗书尊扈跸玄成阅阅竞冠簪文章颇厌时人望事
业空悬薄海心生平不堕寻常泪为尔临风涕满襟

十载曾闻幼妇词愿将银管写乌丝愁当鸚鵡争传处痛在玲珑再唱时旧谱空教蛛网遍闲
情犹有笛人知从今锦字休零落一认弓衣也泪垂

失题四首

频年把菊种东臯海上重来踏六鳌偶向人间留姓字过烦长者问蓬蒿顿惊有道襟期爽更爱新诗品格高晚向画屏开酒瓮酣吟不待紫檀槽

铃阁钟声破黑酣斋居弥勒恍同龕旧闻游屐耽江左早有诗名重渭南倩画佳人清似水自书小字细如蚕英风更入神明颂空阶蟾光浸碧潭

尺五天边位望尊高怀独欲托芳荪梅花此日调成鼎杨柳他年种作村岳色几曾抛箭枯河声尝是梦崑崙等闲鸡犬相闻处不少田家老瓦盆

几次辞官更拜官无求容易有求难年华肯向忙中过世事皆从悟後看署里松枝供秉拂池边鸥鸟识垂竿买山倘为巢由计紫阁峯西辟药栏

赠汾阳杨司训

汾上春归雁早来冷泉关外草花开晴岚故绕官桥柳迟日全融汉殿槐异县岂云分苜蓿愁心翻怪梦台骀匡时知有天人策且对华灯覆玉杯

程都阆还姬诗

十五盈盈抱锦衾广陵涛并楚江深只言叶可盟新侣谁信花能返旧林季女怀春羞碧玉将军重义薄黄金罗屏屈曲围红烛照彻千秋柳下心

失题

朝来山下适相逢便去看山兴倍浓路指垂杨石齿齿云迎珠树水溶溶洞中琼药藏红雪岩际飞泉走玉龙更有长鸣天外鹤徘徊只在两三峯

五排

上卞芝亭观察

任倚股肱重家承节钺雄文章传紫府纓佩出珠宫泽并汾流远声偕霍岭崇召棠犹陕北郇雨已河东鳌极安桑柘龙门润桂種康衢宣帝力姑射领仙风列戟高连华称觥近祝嵩梅花开鼎实桂树发岩丛大厦欣云构劳生慰转蓬韦平依峻閼燕许仗宗工化普生何厚知深道未穷长吟亲独坐正映海霞红

七排

河中形胜

关设蒲津厄两壩城临天堑控三边朱薨杰构重华殿翠琰穹题广孝泉五老山高横晚照二妃陵古起愁烟龙门北顾思前圣雷首南观忆昔贤渡口铁牛唐室建汾睢宝鼎汉家迁海神望秩时仍故河渚居歆岁不愆城郭一般犹舜日山川万古是尧天蕨芽旧采余偏嗜桑落新篋衆所便陶邑器成还苦窳帝乡民杂更颠连盛时揖让皇风泯叔世交侵霸习传比屋可封今已矣画衣不犯亦茫然五刑弼教焉能措三木收威未易捐少似夷齐能逊国多如虞芮好争田君侯司权铨衡重部使分行黜陟专持节义当勤察访更弦须在谨承宣共期风化隆先代咸五登三万亿年

七絕

题汪东川编修秋山读书图

金马门前好是闲暂来云壑听潺湲他时若访丝纶客只在山光树影间

题园壁芦雁

斜阳芦荻隐寒烟接翅汀洲自在眠只待晓风轻振翮长鸣依旧傍青天

丁丑二月再过安陵喜晤臚臣抚今追昔成诗四首【存一首】

三十年来叹路岐相逢各讶鬓如丝登堂风物原无改仍似山翁把酒时

伊阳道中口占二首

归路輶轺趁晓晴伊流风细縠纹生仙人故作凌波步先在安陵道上迎

明璫珠佩各嫣然大似双成共拍肩金缕枕边香入梦朝来特为写红笺

颍许絕句二首

颍水春时如碧玉宛转东流颍浅沙一夜风声在杨柳朝来吹作郁金香

埽地久同郭有道转盐初学王伯齐梦到五更益安稳两年听惯汝南鸡

焚诗

十载支离苦负情柔词绮语可怜生从今烧却梅花赋别有深心到广平

兰畹金荃絕妙词伤人元气起人思渊明已是何人物文选楼中有异辞

简韩子固

君家墨妙谁能及片牋携归山舍中千里相思比相见几回叉手对屏风

蔡琰

汉家国是入哀弹帐秘将人更不安空有辨弦知识在金徽抛却不重看

哑娼【刺绣】

合欢床上绣鹣鹣半向停针揜指尖蓦见蹴花双燕入轻泥落处默生嫌

观柳明庵演金雀杂剧戏赠

相公曲子久堪传不是痴肠不是颠领尽人间花月味风流重见柳屯田

联句

古藤书屋送吴徵君魏上舍联句

握手古藤下秋深旅愁积归来西溪旁犹及种春麦【吴雯】我亦袖轻鞭明发辞紫陌倦鸟不同飞各自张旅翮【魏坤】二子澹雅才肯为时俗役英词迭相应如以桐扣石【陆嘉淑】柳塘水淅淅蒲坂山驿驿改岁君到时古藤花满格【查嗣璩改名慎行】大房一斗泉酿酒冰雪白酒熟君不来落花良可惜【朱彝尊】

莲洋诗钞卷八

卷九

钦定四库全书

莲洋诗钞卷九【诗余】

蒲州吴雯撰

咏槛竹【卜算子】

何处玉玲珑槛外清陰护带露和烟似有情写得离骚句
屈曲箨龙根直上青云去惊醒幽人卧北楼一阵湘潭雨

雪中雁字【青玉案】

凌云赋就谁能和才写出惊天破镌刻瑶华随咳唾纵横姿态龙跳虎卧岂止如椽大
长笺拟献灵芝座又恐虚空遭点涴脂粉那堪供一抹仙人飞帛大书不错笔阵横空过

大风【蝶恋花】

昨夜北风翻海水扑损帘旌欲住真无计无梦到家家万里揽衣频作三更起
苦被浮名牵未已搃使名成华髮何滋味表圣祠东风物美白云招我归来矣

和融谷【望远行】

牵牛花外蒙蒙雨愁絕江淹一赋鲤鱼风近青雀舟横吹散髭丝如许酒客零星醉向长亭远
望正有宾鸿南去唱河梁又蚤青山将暮延竚屈指金门词伯似病沈於今堪数八柱堂西伏
波岩北驱尔三年闲住恰有柔奴作伴藤梢橘刺引出怀人句喜归来便是去时愁处

重阳九阙【望江南】

重阳日斜照小银箏攜酒偏宜高处醉寻诗好向菊边行难得此朝晴

重阳月又是半轮秋水雾蚀金流北垞海风吹玉贴南楼指点见沧洲

重阳夜露下着衣寒虫响渐教支枕听花枝端合下帘看才罢倚阑干

重阳雨骤响入空庭断续泥沾驰马埭横斜声乱护花铃仔细把蕉听

重阳菊朵朵着精神密叶不须防醉客踈枝偏称傍闲人冷韵特相亲

重阳酒新酿熟葡萄送处只愁沾翠袖翻时莫惜污青袍痛饮读离骚

重阳客高卧海东头静处千竿风雨节闲中一笛海天秋整理钓鳌钩

重阳句点笔意闲闲戏马台前驰骋後蓝田庄上醉醒间写与小双鬟

重阳雁影入碧天斜紫塞霜前排锦字罗浮雪後踏梅花嘹呖出朱霞

莲洋诗钞卷九

卷十

钦定四库全书

莲洋诗钞卷十【遗文】

蒲州吴雯撰

寄阮亭先生书

别慈顏久矣依依左右无日不然家居备极苦趣已屡陈於老伯之前无烦更道矣中州皇皇
年余实图一劳永逸而究事愿多违然从此得田三十亩五崖伯之惠何可忘也所恨赋命薄
劣归而病困且婚丧并举所费不貲年来转增逋负顿令此中扰扰万不获已勉为潇湘之游
而长沙古称卑湿贫国当事所行又非区区所执故所如辄不合家人有作宰者又复解官是
侄以数千里之奔驰不能不行叹坐愁自困於洞庭之南祝融之北矣今且寄食华容令君处
秋风凉冷决计归矣筹此往返不惟无益而更滋累甚焉不知何日更能追随杖履承色笑成
一诗即就老伯正之为一文即过老伯裁之每念此乐未尝不精神飞动宛然花前载酒执经
问字时也前在里门时即闻东亭先生有异说至今恍惚不敢遽以为信是以未敢少伸慰问
如果然则老伯骨月之间亦何其多变也言之痛悼之极因思谢太傅看山携伎虽暮功之服
不废丝竹盖实感哀乐於中年而且用销烦忧於暇日也尤望老伯善自寬释善自珍摄拳切
之私最诚最恳幸鉴照容纳之耳方山先生近履想益佳胜昨始得其紫海所寄书深荷存注
伏望老伯为侄一申谢为感潭州颇有作不能备录文二首恭上删削吴霜越鬢怅情事之日
非沅芷澧兰叹山川之多阻低徊北望弥切瞻依惟冀汪涵可胜忭悚

寄姜西溟书

十一月二十八日雯再拜西溟先生阁下但有北使至未有不首询先生动履知先生精力强
盛日事着述且求法书者接踵户外裹饼金尚不能得只字甚慰甚慰元彦兄至益悉道范佳
胜又得读塞游图小记深感先生拳拳记录如此非古所称知己者耶日望先生西来比知史
事相萦恐不能一过莲花峰下宿矣悬仰悬仰近闭置使院同客朱字绿兄好作古文辞因勉
令同作辄不禁浸淫为之因思曩者尝奉教先生猥以庸惰不知黽勉今欲更为之而不得日
侍先生为指南可惜也更念居恒慨慕古人如韩欧阳者而恨不同时如先生同时矣且从之
游矣不能毫得其益窃叹资质庸惰即遇韩欧阳亦无用也至於见贻法书弟见装潢成帙并
有小记书後即友人处装成者亦有小记书後虽不成语然其倾仰笃嗜亦不可谓不至然则
弟於先生亦可谓知己者也不然亦侯芭之流也先生又何可鄙弃而不教我耶闲中望更多
书小幅或真草皆不拘惟多寄为感耳少间亦当书近文字奉质也字绿尚有求先生文字知
必慨为操笔亦不俟弟之晓晓矣雯再拜白

与梁皙次先生书【共四札今录二札】

忆三湘返棹浪迹堪怜而更以病驱几难自问特蒙老年伯存恤慰藉感次心骨别後风雪特甚兼以病阻迁延於嵩高伊洛之间直待年底始达里门想多生之业不丝毫历尽亦不为取报之无私也归里托庇慈荫渐获平复分拟杜门而世务牵系应考汾阳遂又之京师席不暖而突不黔亦不知鹿鹿者何为都中即寄栖阮翁伯之庑下时获提命之益又承代谋醪赆援廩例入雍以免更受学使者之威严北闱旅进困蹶犹昔十月间阮翁已奉使海南而侄亦往来瀛津不名一钱寄食於人此即别来之大较也然经此千锤百鍊渐亦稍有知觉当下具足本无缺欠亦无人我之分别亦无古今之久暂但恨筋力柔脆不能担荷而杂以事务未免时显时晦昔人所以云舍百齡於中身殉肤肌于猛鸷非实力以踐之恐亦不能一了百当也恭惟老年伯精詣已久正合皈依犹望指南茲因王舍亲回鄢敬藉候福履临稟可任驰恋悚企之至

二

屡承宠召感镂心骨非盘飧之下辄作过情逢迎之语大抵意中无此人则或忽略之遗忘之而惟惓惓不置者恒於此际亦见一斑侄虽饱其德实感其意也呜呼意气语谁不能道及阅历既久惟老年伯为最真耳灯下兀坐默念萍踪飘泊辄泣数行下乃备述其途穷之状及知己感恩诗一首侄之意尽於此矣复何言哉复何言哉公?年伯兴致反不如作司寇时侄亦非不能勉强相求而顾以生平所期望之人亦必令故人之子作奴顏婢膝之状侄反恐待颍川之薄而愿甘於在縲紲之越石也乞老年伯若遇时一谕其意之所在或共商其所以为小侄地者侄非吴儿之木人石心自当知之艷词侄已尽焚矣有题焚诗诗云十载支离苦负情柔词绮语可怜生从今烧却梅花赋别有深心到广平又云兰畹金荃絕妙词伤人元气起人思渊明已是何人物文选楼中有异辞侄之意亦可见矣然其得力於老年伯者岂浅鲜哉近僮仆多病旅店倍增惆怅月内拟旋老年伯其何以教我外佩韦集一册戊申所作惟评示之临颖依切

与笨山舍人书

予每读史於隱逸方技传喜不忍释手且惟恐其易尽也盖其内必多澹泊宁静之言而亦可以少窥道德之奥也骊城笨山舍人与予同学且十年矣久而同志偶读仙传乃自刻每传以一小诗櫟括之日以若干首为程既卒業使予为数语书於卷端以志岁月余时方涉河潼过太华终南太白日在襟袖此皆仙灵之窟宅也顾劳劳尘土不能述其梗概取所谓旷邈精鍊之轶事盛迹一凭吊而歌咏之可耻也已而笨山方筑欸乃书屋於漕河之湄键户危坐读书赋伟句渔歌樵影交於户牖呜呼远矣犹龙氏不云乎不出户知天下其出弥远其知弥少予诚媿笨山哉然笨山亦尝欲作关辅之游矣秋高雁翔其肯携诸咏以乐乎穷车箱之谷登太华之巔此时惊人之句不必远假於谢朓也相与欢呼而豪咏之如卫叔卿古丈夫白云先生之流皆可令之骇愕而出把臂而游予虽謏陋犹当踵其後而和之矣

吴观察克庵诗序

海丰吴公温恭笃厚其为政以正人心厚风俗为本镇河东不三载人饫其德俗化其教间出其所为诗示余至性蔼然深有合于三百篇之旨焉人皆服公之善为诗而不知公之所以为诗即公之所以为政也夫雅颂之什春容博大皆贤士大夫之所作故读其诗即可以观一代之政未有措之於政不能涵育岂弟优游而驯致之而发为声歌有以中和平之音而备温厚之旨者也故传称诵诗三百不达於政即不可以为能诵诗之人夫诵诗而不达政尚不可以为能诵诗者而顾可谓能为诗者乎则信诗与政通也昔李百药见王仲淹而论诗上陈应刘下述沈谢声病刚柔靡不毕究而仲淹不答也薛收曰吾尝闻夫子之论诗矣上明三纲下达五常於是徵存亡辨得失小人歌之以贡其俗君子赋之以见其志圣人采之以观其变今子之所言皆夫子之所痛也由河汾之论观之则益以知诗为君子见志之言而即为政之所从出也今公之为政亟亟焉宣布

圣天子之德意於人心风俗之际推诚晓譬几於家置一喙务求三纲明而五常达则是为诗之本先具矣而出其绪余以流连於山川景物以及朋友赠答行迈讌赏之末又何有不协於雅颂之贤士大夫备春容博大之观而中温厚和平之美乎且投簪志切今始遂悬车方将於致政余闲而更乐其啸咏之适於山见泰山之高於水见沧海之深岂不益有以纾其怀抱而托其遥情也乎乃者主爵惜公之去请於

朝再将以他故属公吾知公以耆硕之望而再着其历链之才昔韦左司领剧职而愈优文潞公入中书而倍健而两公之诗清远丽密晚益造微今公不遂厥初服将仍出而为政吾知公之所以及人者不在两公後而其所以为诗者亦不在两公後也诗有之曰吉甫作颂穆

如清风吾将为公载咏焉

赵秋谷并门集序

岁甲子秋谷使於晋得诗百篇以示余其诗结体清真脱去凡近非曰字句之工而已余尝论古人一言一咏皆有体格体伪而格下者虽声文斐然皆凡也近也秋谷抱异才负奇气淳泓骏发其於世也率情自好无所缘饰故其为诗也直而不俚高而不诡盖如其为人矣夫十五国之风诗唐最近古秋谷行其地其有取於陶唐氏之遗风而为之者乎余晋人也山川都邑登临览观之胜皆少所习者顾不能言之及秋谷言之而正如余意即恐余虽言亦终不逮也其在唐风有杕之杜曰彼君子兮噬肯来游中心好之曷饮食之抚斯集也咏是诗而三叹焉

万漚庵诗序

新城王先生论诗絶句云高论沧浪万古留止凭妙悟一言收又云诗情合在空舲峡冷雁哀猿和竹枝故诗之为道必有妙于色相之外者始为上品为絶调羚羊挂角无迹可求岂可以思议及岂可以语言索哉善乎庄生之言道也曰夫道有情有信无为无形可传而不可受可得而不可见然则读书堂上遂为堂下斲轮者所笑顾知有句无句皆为滞语善学者甚不可以一芥遮天一尘眯目也丙子冬客宛丘已半载始能拜莫亚夫先生於其堂先生为先临颍

府君同门友也八十而有婴儿之色读书万卷老而弥笃亟述宛丘所与往还朝夕者万子滙庵而已且云滙庵寡交游闭户息影所与执经问难亦惟亚夫先生因持其一诗见示有孤舟烟雨荷花渡五月关山杜宇鸣之句心窃异之未几而即晤於亚夫先生座中气肃而体庄沉默渊深不可涯际时方持兄服谨而戚呜呼滙庵至性人也及读其所录诗凡百首滙庵又有至情夫无至性不可以为诗无至情亦不可以为诗性情者非诗而即所以为诗此即所谓有情有性无为无形者而又何远索哉滙庵既得其所以为诗可以於有字句中索滙庵亦可以於无字句中索滙庵滙庵亦可以於有字句中索诗亦可以於无字句中索诗然则余之所以望於滙庵者又岂但诗而已哉余愿滙庵即诗而通之天地之始终山川之流峙日月寒暑之推迁风雨露雷之变幻人物鸟兽草木之出入消息谁纲维是谁鼓舞是皆此物此志也以此论诗诗之境界大矣以此悟诗诗之本源远矣请以质之亚夫先生必有不迕庭余言者他时即上谒新城先生亦当嗒然而笑也时丁丑人日

罗萝村诗序

康熙戊午春方以博学鸿儒徵天下士於是士之能文章者咸集京师而会稽罗子萝村亦用大司农梁公荐应

召至时余未识萝村然窃闻其为人行至高居母夫人丧适丁贼乱里人皆惊避萝村独处空山守倚庐不肯去会贼大至见伟丈夫衰絰骨立苦出间无惧容贼衆皆叹异相戒退曰此孝子也愿无惊扰孝子萝村

生平自立可称述者甚多论其大节已卓卓如此余用是急欲识其人是萝村之所以至京师者以其文而余之所以愿交萝村者则以其人也自是数过从遂发其篋衍尽读所为诗歌古文辞贍而则约而能肆博辨而弥厚私心益敬重之是向之愿交萝村者以其人而後以交其人因得穷其所为文也越明年己未三月余与萝村皆放还萝村後入湖南幕府涉洞庭下熊湘而余亦浩然归卧中条之麓家居数当骨肉之变忧伤荼苦转以疾困足不出户限者且一年萝村顾於数千里外时通尺一问讯慰劳无虚月其笃於朋友又如此继又数勉余作潇湘之游而余亦以它事南来得再握手使院中风雨琴樽晨夕无间回忆曩岁蹀躞黄金台上时直昨日事而鬢髮各变感慨系之矣已更出其所已刻诗凡十三卷曰子盍为我益细论之余自惟不敏何足以言诗顾窃以为古之为诗者大约皆出於忠臣孝子劳人思妇所不能自己之情初无意於为诗而矢口信心其诗亦遂为後世之所莫能及而为圣人之所乐收今萝村既得其所以为诗者矣尚有疑於声韵之微体裁之末乎其诗古今体具备而更附以长沙感时赋事诸什盖萝村身在军兴久矣亲见戎马交错杀伤狼藉妇子累系井里萧条虽大寇已殲而荒郊废垒残骸撑拄每悲风四起惊沙乱飞鸟鸢衔肉而昼翔豺狼穿穴而暮嚎故其诗益慷慨悲啸苍凉激楚而不可读呜呼萝村仁孝凝静人也向在山中身临白刃而不惧而何以至此则感怆涕洟之无从也岂非在已则其天已定而在人则胞与之怀又不能以自己欤然则读萝村之诗益以见萝村之为人也呜呼萝村岂但为诗人也哉

画雁记

画雁一卷其数百其飞翔羣集各有态皆安详容与远近匹俦於蒹葭丛苇之间若各适而无惊弦离羣之恐其景况萧远沙明水澹宛置身潇湘洞庭闲旷而不拘迫乐豫而不愁蹙虽画者禽鸟羽毛之属而其境界清适足以生人远襟旷怀则甚矣画之妙者能移人性情如此也昔戴安道就范宣学皆为范所为惟独好画与范殊范以为不宜劳心於此戴乃画南都赋图范始咨嗟甚以为有益始重画余尝谓古人左图右书今之所谓画即古人之所谓图也何可轻渺置之耶此卷厚卿先生宝秘之凡二十年矣一日出以相示於蒲东官舍秋风萧瑟菊英满庭相赏皆在笔墨蹊径之外因忆畴昔读离骚经爱美人芳草遂发兴为湖湘之游以为长沙清絕之区而琴曲中平沙落雁为潇湘胜概迺屈子七题二十五篇中都无一雁字何耶惟其弟子宋玉为其师作九辩有云雁離離而南游又云鳬雁唼夫梁藻詎屈子忧谗畏讥以为雁有矰缴之患故不及之耶抑驷虬乘鸞戒鸾凰而腾凤鸟驰於远者遂忘於近耶今观此卷乘居匹游相与恬适於汀洲苹藻虽稻粱之不充亦爵罗之自远又何必乘鸞腾凤之始为适也哉先生好古成癖积书数千卷多集古人书画名蹟度而藏之与好事者持觴浮白评隲较论无不中肯綮者昔秦太虚官汝南高符仲携輞川图相视太虚欣然即使二儿引閱以为恍若与摩诘入輞川度华子冈经孟城坳憩文杏馆上斤竹岭絕茱萸泝宫槐陌窺鹿柴返於南北垞航欹湖戏柳浪濯栒家瀨酌金屑泉过白石瀨停竹林馆转辛夷坞抵漆园茗饮赋诗都忘身之在汝南也今与先生共阅此图即如偕先生登岳阳楼泛青草湖过君山谒黄陵庙听湘灵鼓瑟与宋玉景差贾谊庄忌辈招三闾大夫同翱翔流览於平沙落雁间也先生属题数语聊书以复先生愧才不及退之画记细述雁事如人之事三十有二人大小百二十有三马之事二十有七马大小八十有三也

洗笔池记

湘乡县北有池如半月曰唐登善褚公洗笔之池昔公以諫武昭仪事出为湘潭都督潭州山水荒险可观游者少至湘乡而景物稍幽秀公行部及之而有爱焉理或然也而後人因公之所流连既重公能不爱其地与地多塘坳相接遍种荷芰菱芡而兹池独谓公浣笔於斯岂非公书特精妙故称之以志美与咸淳中得断碑於池中刻公之诗曰远山 峯翠凝烟烂漫桐花二月天游遍九衢灯火夜归来月挂海棠前清丽而闲适无迁谪之意则公当日其所以与潭人同其乐者又可见也公镇潭爱潭之人即於斯池亦足以见潭人之不能忘公而窃谓公之所以不可忘者又不仅区区镇潭一日之爱也盖公之贤天下莫不闻故凡公之所偶一历览其流风余韵千百世後无不令人凭吊慨慕而不忍去也则公之所以感人者何如哉而当日为之上者摈公惟恐不急甯公惟恐不远者何也岂非爱憎之至变而艷处之蔽者深与而因思有国家者未有不欲其臣之忠于上也忠矣而往往遇之不以道不惟资之庸下而有所蔽者然也即有为之主亦不能免焉岂贤者之所遇有幸不幸哉亦其势然也而至於公之所值则更以庸闇之主而兼以宫壺之私宜其还笏殿上而即潭州而南荒不瀕於死而不已也则公之流连於斯池也岂真有爱於此也哉辛亥之初秋过池上仰公之遗徽因悲公之遇而且有感于凡欲行其道而处爱憎之间之难为也尊有酒不禁为公再拜而三酹之

感物

车有箱有轮箱静也似愚轮动也似智轮之劳不若箱之逸也发大石者必以机机狡然似智石魄然似愚机之危不若石之安也然则天下之物智者常劳而愚者常逸也狡者常危而魄者常安也逸者物之所争托岂智者而反忘之智者之劳智者之所以求逸也而不知求逸而益劳安者物之所共适岂狡者而反背之狡者之危狡者之所以求安也而不知求安而益危呜呼求逸於劳而劳益甚则何不求逸於逸也求安於危而危益甚则何不求安於安也夫求逸於逸求安於安者何也盖凡物莫不贵反其本劳生於智欲远其劳但屏其智而已矣危生于狡欲免其危但絶其狡而已矣独奈物之愚者少而智者多也魄者少而狡者多也且愚也而所以为智者无不至焉魄也而所以为狡者无不至焉卒令竭一世之扰扰而至於不可救者何也

书义山河阳诗後

义山河阳诗乃悼亡之作也王茂元为河阳节度使爱其才以子妻之故诗曰河阳隐辞也其诗云黄河摇溶天上来玉楼影近中天台正言甥馆之美百辆之盛也龙头泻酒客寿杯主人浅笑红玫瑰盖谓琴瑟之调而容色之丽也梓泽东来七十里四语则且歿而葬矣南浦老鱼腥古涎四语则欲梦见亦无由矣忆得蛟丝裁小卓四语则又思其平生之事也幽兰泣露新香死画图浅缥松溪水即画图省识春风面之意也楚丝微觉竹枝高半曲新词写絃纸则又思其生平所作歌曲也巴陵夜市红守宫後房点臂斑斑红则又思其闺房之戏也堤南渴雁自飞久芦花一夜吹西风则又伤其没也晓帘穿断蜻蜓翼以下所云玉湾不钓莲房破惜伤爱絶也银镜鸾钗抚遗物也桂树金茎亦思少君之术也相风插屋候其至也至百劳不识湘竹千条则亦终不可见徒泪积斑斑耳其意婉转其词深沈虽效长吉而情种自见也

铭赞

疾铭

疾本无疾病本无病不能调御辄致凌竞如水起沔似木生癭沔癭何来即水木性金刚不坏第一无诤知常曰明法天曰圣守中致和尽性至命一念万年寓诸无竟

準提像赞

稽首準提王功德不思议百千万手目拯济恒沙衆将身坐宝莲为世见光影若论其究竟无在无不在嗟我虬蝨身负障等山岳身见不能忘山岳何时了伏望慈悲力默相加护佑一切非一切无上解脱门身色如琉璃昙云四弥布如是衆生尽佛愿即完满

莲洋诗钞卷十

附錄

附錄

送吴天章归中条二首 王士禛

二月春芜綠纷纷蝴蝶飞花朝逢暮雨寒食減征衣道路谁知已登临不当归中条多水竹此去掩荆扉爱汝王官谷他年拟借居三峯当户牖五姓足樵渔田舍堪怀古茅茨宜读书独怜好身手归去注虫鱼

又一首 王士禛

中条最深处风物四时幽水鹤穿云下林枫夹岸稠人烟盘豆驿村路玉溪流卧起清晖里萧然何所求读冯圃芝余事集因题吴天章还山诗卷

王士禛

木脱石气清吟君古调诗落日高鸟去碧空澹凉颼一吟扣一弦一吟倾一卮嘈嘈立部伎子子寡女丝巧笑倚市门漆室声苦悲猿鸣上峡夜雁惊团沙时遥忆中条山云物秋正奇吴生家山南拾橡恒苦饥朝吟看云出暮吟逐云归河声与岳色中有太古词谁为昭与聋独有冯生知【自注天章在燕市得古铜章文曰河声岳色所居正河岳之间也】

挽天章徵君 王士禛

生入甘露门死为甘露灭岂况无生忍不生亦不灭予昔事禅悦兼复慕游仙门前玉女峯上有十丈莲下界六十年逢场暂游戏来去衆香国终然饱禅味不屑海山住应归兜率天下视大火聚螻蛄争扑缘已空文字障静閱庄严劫何事劳结集犹烦大迦叶【天章逝时异香满室与先兄西樵同衆香一语亦脗合奇矣】

怀旧 赵执信【蒲州吴雯莲洋拙於时艺困蹶场屋中体貌粗丑衣冠垢敝或经岁不盥浴人咸笑之而诗才特超妙余尝比之温飞卿云与渔村同荐既试报罢其父故与阮翁同年始入都以诗投谒阮翁心折极口为延誉而其性迂僻寡合遂沦弃终身与余甫一见如旧相识余好用冯氏法攻人之短惟莲洋不以为忤其作字用冯法粗知间架然不能工也晚相值於津门出诗卷见示曰曩之所攻悉删改矣乃知其非名輩所及也属余论定余请俟异日盖其时正逢阮翁之怒不敢阑入诗坛故耳又数年莲洋卒於家卒後其集闻送新城阮翁为作墓志且删定其集迄今将二十年矣而未行於世意其时阮翁耄而多忘未几遂亡未及归诸吴氏耶若然池北藏书散失殆尽莲洋集从可知矣】

筑室中条山招手玉女峯黄河遶门前涤荡万古胷埋头试牖中啼号羞秋虫风骚适榛芜挥

刃侔神工脱弃范陆习践履岑高踪貌似温方城才与遇并同诗老性护前於君礼独隆贵游
负贩豪交臂来趋风声名天可假时命人能穷濩落王官谷穿冢连司空遗文寄池北飘散随
萍蓬追维平生言使我心忡忡虚疑玉溪底匣剑藏芙蓉终当沉铁网大索蛟龙宫【王官谷
玉溪皆在中条】

题吴雯徵君诗卷 朱彝尊

藉甚吴郎大雅才赋诗不上栢梁台翻飞却似横汾雁几度秋风上苑来

莲洋诗钞附录